

Dill' wen dill' kob daa bzej

Márcona'

Juanna', beena' bchoa ben' nis

(Mt. 3:1-12; Lc. 3:1-9, 15-17; Jn. 1:19-28)

1 ¹Ki wzolo dill' wen dill' kob che Jesucristona', beena' nak Xiin Chioza'.

²Gok ka wna dii Isaíaza', beena' wdixjee daa goll Chioza'ne': Wselaa to ben' kwialoe' lawo'na', wi'e xtilloona' kwenche ba lle' ben' wzenague' cho' kat' illino'.

³To ben' wnie' zilljə to lo latj gana' bibi chashj chleb, chi'e: "Li se kwas wzenagle che Xanchona' na' wsalj yichjlall'do'leka' kat' zee."

⁴Na' bllin Juanna' latja' gana' bibi chashj chleb. Bchoe' ben' nis, na' wdixje'ile' ben' chiyal' yiyaj yilengakile' na' choagake' nis kwenche yizi'xen Chioza' saaxya che'ka'. ⁵Na' yog' ben'ka' lle' gana' mbani Judeana' na' ben'ka' lle' yell Jerusalénna' jazenaggake' dillaa cho'e. Na' bixoadol'gake' saaxya che'ka', na' bchoa Juanna' legake' nis loo yao Jordánna'.

⁶Na' xa Juanna' gokan de xa kamey na' bchej lsineena' to yid. Na' wdawe' bish'zo na'ch shin baser dii de lyixaa. ⁷Na' wdixje'ile' ben'ka' cho'a xtill' Chioza', chi'e:

—Zi' za'lə beena' napch yej' wak xench ka nad', na' ni bi zakaa gak' xmose' kwenche wlechj' xele'na'. ⁸Nad' ba bchoa' le' nisa', san le', gone' ka yidsoa Espíritu che Chioza' loo yichjlall'do'lena'.

Jesúza' wchoe' nisa'

(Mt. 3:13-17; Lc. 3:21-22)

⁹Na' kana'yen' Jesúza' wzee yell Nazareta' daa llia gana' mbani

Galileana' na' wyaje' cho'a yao Jordánna' gana' bchoa Juanna'ne' nisa'. ¹⁰Na' shlak chichej Jesúza' loo nisa', ble'ile' byalj yabana' na' betj Espíritu che Chioza' jsoalene'ne' na' ble'ile' Espírituna' ka to palom. ¹¹Na' bengakile' wne Chioza' yabana', chi'e Jesúza': —Lin' nako' Xiin', chakchgaid' li' na' le chibaid' li'.

Dii xiwaa goklalliin kooyela'n Jesúza' gone' ka cheenin

(Mt. 4:1-11; Lc. 4:1-13)

¹²Na' lii bche'te Espíritu che Chioza' le' latja' gana' bibi chashj chleb. ¹³Na' wzoe' na' choa lla ladj ba zniaka', na' Satanáza' daa chnabia' dii xiw'ka' goklalliin kooyela'n le' gone' ka cheenin. Na' ka wde, jaklen anjlka' le'.

Wzolo Jesúza' choe'lene' ben' xtil' Chioza' gana' mbani Galileana'

(Mt. 4:12-17; Lc. 4:14-15)

¹⁴Biyoll wloogake' Juanna' lillyana', Jesúza' wyaje' gana' mbani Galileana' na' je'lene' ben' dill' wen dill' kob che Chioza', ¹⁵chi'e:

—Ba bllin lla inabia' Chioza' loo yichjlall'do'lena'. Li yiyaj yileni dii malka' chonle na' li shajle' dill' wen dill' kob che'na'.

Jesúza' goxe' tap ben' wxen bel


(Mt. 4:18-22; Lc. 5:1-11)

¹⁶Shlak ngoo Jesúza' nez cho'a niso' che Galileana', ble'ile' Simónna' len ben' bishee Andréza', chzal'gake' yixj daa chzengakile' belka' loo niso'na', la' lennan' noni xshingake'. ¹⁷Na' goll Jesúza' legake':

—Li da, dino nad'. Na' ka chonle chbejle belka' loo nisi, ka'kzan gonle yibejle ben' lao dii mala'.

¹⁸Na' ka biyoll golle' legake' ka', lii bkwaan'tegake' yixja' daa chzengakile' belka' na' zejlengake'ne'.

¹⁹Ka ba wza'gake' zi lat', ble'i Jesúza' Jacóbona' len ben' bishee Juanna', ben'ka' nak xiin Zebedewa', lle'gake' loo barkwa' chiyonshao'gake' yixja' daa chzengakile' belka'. ²⁰Na' lii wnetie' legake', na' bkwaan'gake' xe'ka', beena' le Zebedeo, len ben'ka' chaklen legake' loo barkwa', na' wyajlengake' Jesúza'.



Ki gok bal yooka' gana' bdop bllag ben' Israelka' daa bsi'gake' sinagoga.

Jesúza' bibeje' dii xiwaa yoo to ben'

(Lc. 4:31-37)

21 Na' bllingake' yell Carpernaúma'. Na' lla sabda', llana' chombaan ben' Israelka', wyaj Jesúza' gana' chdop chllaggake' choe'llwillgake' Chioza' na' wzoloe' chli' chsedile' legake'. 22 Na' bibani ben'ka' lle' na' ka chli' chsedi Jesúza', la' bli' bsdile' legake' lega ben' nap ye'l' wñabia', na' bi chli' chsedile' ka ben'ka' chli' chsedi leya'. 23 Na' ladj ben'ka' chdop chllag gana' chli' chsedile' legake', len to ben' yo'e dii xiwaa, na' besyaan, che'n:

24 —¡Jwayi neto!, Jesús, ben' Nazaret! ¿Abido' kwenche wlliyoo neton'? Nad' nombi'a li' na' nezid' nako' dowalj ben' li ben' shao' che Chios.

25 Na' Jesúza' bsheshlene'n, chi'e:

—¡Llizə wzoa! ¡Bichej loo yichjlall'do' beeni!

26Na' dii xiwaa wchoonan beena' na' bchix**̄** btolan le' na' bichejan chosyaadian. 27Na' yog' ben'ka' lle' na' bibangakile', na' che' ljwellgake':

—¿Bi dii kob dga chli' chsedi beeni, lla? ¡Nakbia' nape' yel' wnabia', la' axt len dii xiw'ka' chsheshlene' na' chzoagakan xtille!

28Na' lii wzete dill' doxen gana' mbani Galileana' ka nak daa chon Jesúza'.

Jesúza' biyone' tobiin che Simón Pédrona'

(Mt. 8:14-15; Lc. 4:38-39)

29Na' biza' Jesúza' gana' chdop chllaggake' na' biyajlene' Jacóbona' len Juanna' lill Simónna' na' Andréza'. 30Na' tobiin che Simónna' die' yo'e dii la. Na' gollgake' Jesúza' daa chak che'. 31Na' wbiguee gana' die' na' bexee neena' blise'ne'. Na' lii bichejte dii lana' na' wzoloe' bene' daa wdaogake'.

Jesúza' biyone' ben' zan

(Mt. 8:16-17; Lc. 4:40-41)

32Na' ka ba wxoa wbilla', jwa'gake' lao Jesúza' yog' ben'ka' bi shao' na' ben'ka' yoo dii xiwaa. 33Na' yog' ben'ka' lle' yella' bdi'a bllaggake' cho'a yoona gana' zoe'. 34Na' Jesúza' biyone' ben' chak wde wdeli yillwe'. Na' lekzka' bibeje' dii xiw'ka' yoo ben', na' bi bi'e latj inegakan daa nombia'gakan le'.

Jesúza' cho'e cho'a xtill' Chioza'

gana' mbani Galileana'

(Lc. 4:42-44)

35Na' Jesúza' wyase' ni bal, na' bcheje' yella' jelwille' Chioza' ga kono ben' lle'. 36Na' wyaj Simónna' len ben'ka' nakgake'ne' txen jadiljgake'ne', 37na' ka billelgakile'ne' na'ch gollgake'ne':

—Yog'z ben' chiyiljgake' li'.

38Na' che' Jesúza' legake':

—Li sho' yellka' sto, diika' llia gaozə, kwenche lekzka' llje'len' cho'a xtill' Chioza' ben'ka' lle' na', la' ni cheyinnan' bid'.

39Na' wda Jesúza' yog' yellka' llia doxen gana' mbani Galileana' choe'lene' ben'ka' cho'a xtill' Chioza' yog' gana'

chdop chllag ben' Israelka' choe'lwillgake' Chioza', na' bibeje' dii xiw'ka' yoo ben'.

Jesúza' biyone' to ben' chak yillwe' daa le lepra

(Mt. 8:1-4; Lc. 5:12-16)

40 To ben' chak yillwe' daa le lepra blline' lawe'na' na' bçhek' xibe'na' lawe'na', chi'e:

—Shi cheenilo', wak yikwaso' yillwe'ni chak'.

41 Na' biyesh'lallii Jesúza'ne', na' bçxa neena' yichje'na' chi'e:

—Cheenid'x. Na' naate yikwasa'n.

42 Na' katena' lii bikwaste léprana' na' biyakile'. 43 Na' Jesúza', chi'ene':

44 —Kono yoo dga ba ben' çho'. San wyaj jali'lawo' lao bçzoza', na' jwa' daa chiya' lljoo lao Chioza' ka nllia dii Moiséza' bia' goncho kwenche inezile' ba biyakilo'.

45 Per ka bizee, wzoloe' bi'e dill' lao yog'lo' ben' daa gokə. Na' daa bene' ka', bich gok sho' Jesúza' ka nla'zə yellka', san bigaane' ga kono ben' lle'. Per bia'kzə wyaj ben' za' wde wdeli yell jawiagake'ne'.

Biyon Jesúza' to ben' net ni'a neena'

(Mt. 9:1-8; Lc. 5:17-26)

2 1 Wde to çhop lla, Jesúza' billine' sto shii yell Capernaúma'. Na' ka wnezi ben'ka' lle' na' ba billine' yooná' gana' wzoe', 2 na' bdi'a bllag ben' zan inleeb loo yooná' axt bich chaki lesh' chyooná' she'gake'. Na' bli' bsdile' legake' cho'a xtill' Chioza'. 3 Na' bllin tap ben' nlengake' to ben' net ni'a neena'. 4 Na' daa bi gok illingake' gana' zete Jesúza' daa lle' ben' zan inleeb, na' wzologake' bsaljgake' koll' yooná' na' bletjgake'ne' do daa che'na'. 5 Na' ka gokbe'i Jesúza' chajle'gake' che', golle' ben' we'na':

—Xiin, ba biyakxen saaxya çho'ka'.

6 Na' chi' bal' ben'ka' chli' chsedi leya', na' wza'lall'gake': 7 “¿Berache naz beeni ka? Chonz kwine' ka Chioza'. Kono zoa sto ben' gak yizi'xen saaxya che ben', san toz Chioza' gak yizi'xene'n.”

8 Na' lii gokbe'teyi Jesúza' daa chza'lall'gake', na' wnable' legake', chi'e:

—¿Berache chza'lall'zle ka? 9 ¿Achakile chyalljchid' yel' wak

xench yep' beeni: “Ba bizi'xen' saaxya cho'na'”, ka daa yepee: “Biyas na' bigoo nez”? ¹⁰Na' wliid' le', nad' Ben' Bsel' Chioza' nap' ye! wñabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

¹¹—Nia' li', biyas, bitob daa cho'na', na' biyaj lillo'na'.

¹²Na' lii biyastie' bitobe' daa che'na' na' bizee chwiata ben'ka' lle' na'. Na' yog'zgake' bibani na' be'la'ogake' Chioza', che'gake':
—Bigan' ile'icho ka dga.

Jesúza' goxe' Levína' kwenche gake'ne' txen

(Mt. 9:9-13; Lc. 5:27-32)

¹³Na' wyaj Jesúza' sto shii cho'a nido'na' na' ben' zan janogake'ne', na' bli' bsdile' legake'. ¹⁴Na' wde Jesúza' gana' chi' Levína', xiin Alfewa', chchixje' daa chkaa ben' Rómaka'. Na' chi'ene':
—Da, dino nad'.

Na' wzolla' Levína' janoe'ne'.

¹⁵Na' to shii Jesúza' len ben'ka' nakgake'ne' txen cheej chaogake' lill Levína', na' zan ben' wíchixjka' na' ben'ka' zeyi chegake' nakgake' ben' mal cheej chaolengake'ne', la' ben' zan ba nak ben'ka' no le'. ¹⁶Na' ba! fariseoka', ben'ka' lekzka' chli' chsedi leya', ka ble'gakile' cheej chaolen Jesúza' ben'ka', na' gollgake' ben'ka' nakgake'ne' txen:

—¿Berache cheej chaolenz beena' chli' chsedi le' ben' wíchixjka' na' ben' malka'?

¹⁷Na' ka beni Jesúza' che'gake' ka', na'ch chi'e:

—Ben'ka' zoa shi'a shao' aga no wen rmech chyalljgakile', san ben'ka' bi shawaan chyalljgakile'ne'. Ka'kzə nad', aga bid' ni che ben'ka' nak ben' li ben' shao', san ni che ben' malkan' bid'.

Wñabgakile' Jesúza' biçhe bi chon

ben'ka' nakgake'ne' txen wbasaa

(Mt. 9:14-17; Lc. 5:33-39)

¹⁸To shii ben'ka' nak Juanna' txen na' ben'ka' nak fariseoka' txen choagake' wbas'. Na' ba! ben' wyajgake' lao Jesúza' na' che'gake'ne':


—Ben'ka' nak Juanna' txen na' ben'ka' nak fariseoka' txen choagake' wbas'. ¿Berache ben'ka' nakgake' li' txen bi chongake'n?

19Na' che' Jesúza' legake':

—¿Awak soa ben'ka' chaxe' to ga chak wishagna' wbasaa shlak chak lnina'? Bi gakan, la' shlak zoalen beena' chshagna' legake' aga wak soagake' wbasaa. 20San wllin lla kat' yikwas ben' beena' chshagna' ladje'ka', kana'chan soagake' wbasaa.

21'Ni to ben' bi chida' chichollee lee lech' gola' lat' lech' kob, la' lech' koba' yibe'n kat' chibe'n na' zizikli wchez'chan lech' gola', na' dii xench gak gana' nchez'.

22Ni biga zoa ben' chguee vino koba' loo yid golka', la' vino koba' wchezaan yid gola' na' kwiayi' vino koba' lente yid gola'. Na' daan, chiyal' shall vino koba' loo yid koba'.



B'chingake' yid xa shiba' kwenche wda'shao'gake' vino che'ka'.

Ben'ka' non Jesúza' txen chyishjgake' do che trígona'

llana' chombaangake'

(Mt. 12:1-8; Lc. 6:1-5)

23Na' to lla sabd, llana' chombaan ben' Israelka', wdelen Jesúza' ben'ka' nakgake'ne' txen to ga naz to ben' trigo, na' wzolo ben'ka' nakgake'ne' txen wdishjgake' trígona' wdaogake'n.

24Na' goll fariseoka'ne':

—¿Berache chonz ben'ki nako' txen daa bi chiyal' gongake' llani chombaancho?

25Na' golle' legake':

—¿Ani shlin bin' wlable daa ben dii Davina' to shii kon ben'ka' nakgake'ne' txen ka byallj daa gaogake'? 26Kana' nak Abiatarar' bxoz choo bxoz xen, wyoo Davina' gana' nongake' lill xlatjə Chioza' na' wdoyoe' yetxtila' daa naki che Chioza' na' wdaolene'n ben'ka' nakgake'ne' txen, la'kzi toz bxozkan' chiyal' gaogake'n.

27Na' lekzka' golle' legake':

—Chioza' wleje' llani chombaancho kwenche gaklenen benecha', aga bxe bsile' benecha' kwenchezə we'la'ogake' llani chombaanchon. 28Daan, nad', Ben' Bsel' Chioza' Yell-lioni, chnabi'a lao llani chombaancho.

Beena' net neena' t̄laa

(Mt. 12:9-14; Lc. 6:6-11)

3 ¹Na' sto shii wyaj Jesúza' gana' chdop chllaggake' choe'lwillgake' Chioza' na' ladj ben'ka' lle' na' len to ben' net neena' t̄laa. ²Na' chwiayen'gake' shi wiyon Jesúza'ne' lla sabda', llana' chombaangake', kwenche gaogake' xya che'. ³Na' che' Jesúza' beena' net neena' t̄laa:

—Wzolla' na' wze gchol ben'ki.

⁴Na'ch wñabile' ben'ka' ndop nllag na':

—¿Beran na leya' chiya' goncho lla sabdka'? ¿Agoncho daa nak wen, anti goncho daa nak mal? ¿Ayislacho ben', anti witchone'?

Na' kokzno billii xtilleena'. ⁵Na' ka chwie' ben'ka' lle' na', bllee na' gokyeshile' daa nakgake' ben' lall'do' chech, na' chi'e beena':

—Bli noona'.


Na'ch bli na' beena' na' lii biyakteyin. ⁶Na' bichej fariseoka' na' wzologake' chgoogake' xnezin len ben'ka' non Heródeza' txen kwenche witgake' Jesúza'.

Ben' zan bdop bllag cho'a nido'na' gana' chda Jesúza'

⁷Na' biza' Jesúza' gana' zoe' na' zejlene' ben'ka' nakgake'ne' txen cho'a nido'na' na' ben' zan ben' Galiléaka' wnogake' legake'. ⁸Na' ben' zan ben'ka' lle' gana' mbani Judeana', na' yell Jerusaléna', na' gana' mbani Idumeana', na' ben'ka' lle' shlaa yao Jordánna' na' yellka' ndil nllag yell Tírona' na'ch yell Sidónna', ka wñezgakile' chon Jesúza' dii zan ye'l' wak, na' wyajgake' jawiagake'ne'. ⁹Na' daa lle' ben' zan inlleb, golle' ben'ka' nakgake'ne' txen yisbig'gake' to barkw gana' lljshie' kwenche bi idakwyill' ben' be ben' zilka' le'. ¹⁰La' ben' zan inlleb ba biyone' na' yog' ben'ka' bi shao' chdi'a chllaggake' lawe'na' kwenche gox'gake'ne' na' yiyakgakile'. ¹¹Na' dii xiw'ka' yoo bal ben'ka', ka chle'gakin Jesúza', chongakan ka chchek' xib ben'ka' lawe'na' na' chosyaagakan, che'gakan:

—¡Lin' nako' Xiin Chioza'!

¹²Na' Jesúza' bsheshlene'gakan kwenche bi inagakan ka' ga lle' lla' ben'.



Ki nak yixja' daa bchin ben' wxen belka'.

Jesúza' chbeje' shllin postlka'

(Mt. 10:1-4; Lc. 6:12-16)

¹³Ka biyoll ben Jesúza' diika', na' wleje' ba_l ben'ka' wyazlallee gakgake'ne' txen na' wyajlengake'ne' to lo yaa. ¹⁴Na' wleje' shllin ben'ka' kwenche talengake'ne' txen na' kwenche wselee legake' llje'gake' cho'a xtill' Chioza', na' bsi'e legake' postl. ¹⁵Na' bi'e legake' ye_l' w_nabia' kwenche yiyongake' ben'ka' bi shao' na' yibejgake' dii xiw'ka' yoo ben'. ¹⁶Ben'kin wleje' shllin: Simónna', beena' bisi'e Pedro; ¹⁷Jacóbona' len ben' bishee Juanna', ben'ka' nak xiin Zebedewa', (ben'ka' bsi'e Boanerges, daa zeji ben' nak ka yi' wziw' dii chashj chtin); ¹⁸na' Andréza', Felípena', Bartoloména',

Matewa', Tomáza', Jacóbona', xiin Alfewa', Tadewa', Simón, beena' wlen cananistka', 19na'ch Jud Scariota', beena' bene' Jesúza' lo na' ben' malka'.

Wnagake' che Jesúza' bchine' yel' wak che dii xiwaa

(Mt. 12:22-32; Lc. 11:14-23; 12:10)

20Na' Jesúza' len ben'ka' nakgake'ne' txen biyajgake' gana' zoagake'. Na' daa bizdi'a bizllag ben' zan inleeb, ni bi gok latj gaogake'. 21Ka wnezi ben'ka' nak bish' ljjwell Jesúza', wyajgake' nan ljjaxi'gake'ne', la' gokgakile' ba chaktonte'n.

22Na' lekzka' ben'ka' chli' chsedi leya', ben'ka' zaak Jerusalénna', nagake' che':

—Bezlo daa chñabia' dii xiw'kan' yo'e, na' yel' wak cheyinnan' chisheshile' dii xiw'ka'.

23Na' gox Jesúza' legake' na' bzoe' to jempl lawe'ka', chi'e:

—¿Nakra gon Satanáza' yibej ljjwell dii xiwiinna'? 24Ben'ka' lle' toz yell shi til-len ljjwellgake' na' gaggake' choplə, aga ssha soagake'. 25Na' ben'ka' lle' toz yoo shi illaa ljjwellgake' na' gaggake' choplə, aga ssha soagake'. 26Na' shi Satanáza' na' dii xiw'ka' nak lall' na'yin yiyakdilgakan na' gaggakan choplə, bi idiagakan, san ba bllin lla kwiayi'gakanannan', shi ñaa.

27'Kono gak sho' loo yoo lill to ben' wal na' kwane' bi de che' shi bi wcheje'ne' zigaate, na'chan wtesh wlo'e' loo lille'na'.

28'Dii li nia' le', Chioza' yizi'xene' yog'lol saaxya na' yog'lol dii mal daa chbell chne ben' che'; 29san beena' ine zban che Espíritu Sántona', biga yizi'xene' che', na' toshiizi gak xbaguee cheyi daa wchell wnie' che'.

30Golle' legake' ka' daa wnagake' che' dii xiwaan yo'e.

Xña' Jesúza' na' ben' bisheeka'

(Mt. 12:46-50; Lc. 8:19-21)

31Na'ch bllin xña' Jesúza' len ben' bisheeka', wzegake' lesh' chyoonna' na' bsel'gake' ben' janegake'ne'. 32Na' ben'ka' chi' kwit Jesúza' gollgake'ne':

—Ba chiyilj xñoona' li' len ben' bishooka'.

33Na' chi'e legake':

—¿Anezile noran xña'na' na' ben' bishaaka'?

34Na' chwie' ben'ka' chi' kwite'na' na'ch chi'e:

—Ben'kin xna'na' na' ben' bishaaka'. 35Nottezə beena' chon ka cheeni Chioza', len' ben' bishaana', ben' zanna' na'ch xna'na'.

Jempl che to ben' goz goon

(Mt. 13:1-9; Lc. 8:4-8)

4 1Sto shii wzolo Jesúza' bli' bsdile' ben' cho'a nisdona', na' daa bdop bllag ben' zan inlleb jshie' to loo barkw daa chi' cho'a nisdona', na' ben'ka' bdi'a bllag wll'e'gake' cho'a nisdona'. 2Na' dii zan dii bli' bsdile' legake' na' bchine' jemlka', na' golle' legake':

3—Li wzenag dga. To ben' goz goon wzee zeje' goza'. 4Na' ka zej chzalee binna', balan bxop cho'a neza' na' bllin byinka' wdaogakban. 5Na' zi balan bxop ladj yajka', gana' bitek bi yo chi'. Na' tolbe' bilaan, daa bi chi'tekan yona'. 6Per ka bla' wbillan, bkwedgakan. Na' daa bi bde loinna', wbillan. 7Na' zi balan bxop ladj yag yesh'ka' na' yag yesh'ka' bi be'gakan latj igolgakan na' bibi wllian. 8Na' zi balan bxop gana' chi' yo wenna', na' bgolgakan na' le wlliangakan. Balan wllia shichoa wej, na' zi balan guiyon wej, na'ch to guiyoa wej.

9Na' chi'e legake':

—Ka le' chenile dga nia', li sen wneyi.

Jesúza' bzajniile' legake' biche chseesee jemlka'

(Mt. 13:10-17; Lc. 8:9-10)

10Na' ka bgaan stoz Jesúza', ben'ka' wll'e' gaoshosh kwite'na' len ben'ka' shllin, wñabgakile'ne' bi zeji jempla' daa bseesile' legake'. 11Na' chi'e legake':

—Chioza' cho'e latj inezile daa kono wnezi che yel' wñabia' che'na'. Per ben'ka' bi chzenag che', chseesid' legake' jemlka' 12kwenche la'kzi ile'tegakile' ka chon', bi shajni'gakile' bi zejin, na' la'kzi yentegakile' xtilaana', bi shajni'gakile'n, kwenche bi yiyaj yilengakile' lao Chioza' na' bi yizi'xene' chegake'.

Jesúza' bizajniile' bi zeji jempla'

(Mt. 13:18-23; Lc. 8:11-15)

13Na' chi'e legake':

—Shi bi chajniile jempli, ¿nakra gonle shajniile diika' sto? ¹⁴Beena' chaz zaklebile' beena' choe' cho'a xtill' Chioza'. ¹⁵Zoa ben' chengakile' cho'a xtill' Chioza' na' kat' ba bengakile'n, lii zejte dii xiwaa chikwasan daa loo yichjlall'do'eka'. Na' chak chegake' ka gok che binna' daa bxop cho'a neza'. ¹⁶Zi balgake' chak chegake' ka gok che binna' daa bxop ladj yajka' na' aga bi logakin bde. La' ka chengakile' cho'a xtill' Chioza' chiba chizak'gakile' chzenaggake'n ¹⁷per shlollchga chajle'gake'. Na' kat' bi chen chle'gakile' ni che cho'a xtill' Chioza', lii chbej yichjtegake'n. ¹⁸Zi balgake' chak chegake' ka gok che binna' daa bxop ladj yag yesh'ka'. Chengakile' cho'a xtill' Chioza', ¹⁹per chi' yichjgake' diika' chak chegake', na' zetegake' wneyi che ye!' wni'ana' na' chzelall'tegake' yog'lolte daa de yell-lioni. Na' legakannan' chsej chllongakan gon xshin cho'a xtill' Chioza' loo yichjlall'do'eka'. ²⁰Na' zoa zi bal ben' chengakile' cho'a xtill' Chioza' na' chajle'gake' do yichj do lall'gake', na' chon xshinin loo yichjlall'do'eka'. Na' chak chegake' ka binna' bxop lo yo wenna' daa wllia shichoa wej, na' guiyon wej na'ch to guiyoa wej.

Jempl che to kandil

(Lc. 8:16-18)

²¹Na' lekzka' chi'e legake':

—Biga zoa ben' chxene' kandila' na' chdose'n to dii wkwashaan len wa chni'en xan xlague'na', san chzoe'n sibə kwenche wzeeni'n doxen loo yoonā'. ²²Na' lekzka' yog'lolte dii ngash' naa wllin lla yila' lawin, na' daa kono nezi naa wllin lla inezi benaan. ²³Le' chenile dga nia', li sen wneyi.

²⁴Na' lekzka' chi'e legake':

—Li se wneyi cheyi dga chzenagle. Na' shi gonle ka dii le, Chioza' wzajni'chile' le' dii xench. ²⁵Beena' chzenag, zizikchli shajni'chile', na' beena' bi chzenag, axt daa ba benile' lat' yiyal-lallee.

Jempl che binna' daa chgol

²⁶Na' lekzka' chi'e legake':

—Ye!' wnabia' che Chioza' zaklebin daa chak che binna' chaz ben'. ²⁷Beena' chaz chaan, chila' daa chaze' na' chgolan la'kzi

chese' wa chechj chdaze', ka'kzə shi wal wa tella, na' ni bi nezile' nak chak chgolan. ²⁸Lo yell-lioni chla' daa chaz ben': zigaate chila'n, na' chgolan, na' chzen do, na'tech chbian. ²⁹Na' kat' ba gol daa chbian, na' chizi' chilape'n.

Jempl che sa mostásana'
(Mt. 13:31-32; Lc. 13:18-19)

³⁰Lekzka' che' Jesúza' legake':

—¿Bera ka wsaklebicho yel' wñabia' che Chioza', lla? wa ¿bera ka jempl wchincho wsaklebichon? ³¹Yel' wñabia' che Chioza' nakan ka sa mostásana' daa chazgake'. La'kzi lennan' binna' daa liizelozi nesh'ch, ³²kat' ba bla'n na'ch chgolan na' chakan dii xench ka yog'te yix' kwan yoblə, na' chak xoziiinka' dii xen axt byindo'ka' wak lljshiagakban na' sho'gagb xol cheyinna'.

Jesúza' bchine' jempl ka bli' bsdile' ben'
(Mt. 13:34-35)

³³Dii zan jempl bchin Jesúza' ka bli' bsdile' ben'ka' cho'a xtill' Chioza', bene' kon ga zeelo wyajni'gakile'. ³⁴Na' toshiizi bzoel' jemplka' lao ben'ka' bdi'a bllag, na' toz ben'ka' nakgake'ne' txen bizajniile' bi zejin yog' diika'.

Jesúza' bkweze' to yejpe' wal lo nisdona'
(Mt. 8:23-27; Lc. 8:22-25)

³⁵Na' ka gol, golle' ben'ka' nakgake'ne' txen:

—Techo shlaa nisdoni.

³⁶Na' biza'gake' kwit ben'ka' bdi'a bllag na' biche'gake' Jesúza' loo barkwa' daa chi' cho'a nisdona', na' lench barkw yoblə ziyajlengake'. ³⁷Na' wze to yejpe' wal na' wzolo nisdona' chas chataan axt ba chiyollan loo barkwa', na' ba wzolo chbe'n yel. ³⁸Na' ba de Jesúza' chese' xaninna' nkogtie' to dii nkogue', na' jasangake'ne' che'gake':

—¡Maestro! ¿Abikzə chakbe'ilo' ba chbe'cho yel?

³⁹Na' wyase' bsheshlene' be'na', na' chi'e nisdona':

—Lliz wzoa.

Na' wlez be'na' na' wche'lli nisdona'. ⁴⁰Na' golle' ben'ka' nakgake'ne' txen:

—¿Biche chllebzle? ¿Abikzan' gonlilall'le nad'?

41 Na' le bllebgake', na' che' l'jwellgake':

—¿Nora beeni, lla?, axt be'na' na'ch nisd'o'ni chzoagakan xtillee.

Bibej Jesúza' dii xiwaa yoo ben' Gadárana'

(Mt. 8:28-34; Lc. 8:26-39)

5 1 Na'ch bllingake' gana' mbani Gadárana' daa llia shlaa nisd'o'na'. 2 Na' ka bichej Jesúza' loo barkwa', na' wbig' to ben' yo'e dii xiwaa. Na' beeni bcheje' loo kapsanta' 3 gana' none' ka lill xlatje'. Na' kono gok wchej le', ni gdenna' bi ben llin. 4 Zan shii bchejgake' ni'a neena' gdenka', na' tolbe'do' chchogue'gakan, na' kono wzoyi le'. 5 Ka wal' ka tella chechj chde' yaa yaoka' na'ch kapsanta' chosyaadie' na' chgoyoe' yajka' chon kwine' zi'. 6 De zit'lə ble'ile' zej Jesúza' na' bxonjdoe' jatile'ne' na' jachek' xibe'na' lawe'na', 7 na' besyee zillj, chi'e:

—¿Bi wlalli' cho' kon nad', Jesús, Xiin Chios, ben' choo ben' xen! Chat'yoid' li', ¡bcheb lao Chioza' bi wsak'zi'o nad'!

8 Gollan ka' daa goll Jesúza' len:

—¿Dii xiw', bichej loo kwerp che beeni!

9 Na' goll Jesúza' len:

—¿Bin lio'?

Na' che'n:

—Legiónan lia', la' zannto' nak.

10 Na' got'yochgain Jesúza' bi wseleegakan gan yoblə. 11 Na' gaozə kwit yaana' gana' lle'gake', lle' zan kush chaogakb. 12 Na' got'yoi dii xiw'ka' le', che'gakan:

—Bsel' neto' gana' lle' kushka' na' be' latj yiyoonto' legakb.

13 Na' bi'e latj chegakin, na' bichejgakan jayoogakan kushka'. Na' nakgakb ka chopa mil, na' wzologakb chxonjdogakb jabixgakb loo nisd'o'na', na' jche'gakb yel.

14 Na' ben'ka' chap kushka' ziyajdogake' jayellgake' ben'ka' lle' yella' na' ben'ka' lle' lyixaa daa ble'gakile', na' ben' zan jawia daa gok. 15 Na' ka bllingake' gana' ze Jesúza', ble'gakile' beena' wyoo dii xiw'ka' chi'e kwite'na' ba biyakw xe'na' na' ba biyeen biyeeniile', na' bllebgake'. 16 Na' ben'ka' ble'i daa gok che beena' wyoo dii xiw'ka' na' daa gok che kushka',

be'gake'n dill' lao ben'ka' bllin. 17Na' got'yogakile' Jesúza' yiyaje' gan yoblə.

18Ka chiyoo Jesúza' loo barkwa', beena' wyoo dii xiw'ka' got'yoile'ne' wi'e latj shajlene'ne'. 19Per bi bi'e latj, san chi'ene':

—Biyaj lillo'na' gana' lle' bish' ljwello'ka', na' jayellgake' ka nak diiki ba ben Xancho Chioza' cho' na' ka ba biyesh'lallile' li'.

20Na'ch biza' beena' na' jaye' dill' doxen gana' mbani Decápoliza' daa ben Jesúza' che', na' yog' ben' bibani.

Biyon Jesúza' noola' bex' xe'na' na' lekzka' xiin Jairona'

(Mt. 9:18-26; Lc. 8:40-56)

21Ka billinlen Jesúza' barkwa' shlaa nisdona', na' bdi'a bllag ben' zan cho'a nisdona' gana' billine'. 22Na' bllin to ben' le Jairo, nake' to ben'ka' chgoogake' xnezi diika' chon ben' Israelka' gana' chdop chllaggake' choe'lwillgake' Chioza'. Na' ka blline' gana' ze Jesúza', bchek' xibe' lawe'na' 23na' benyesh'chgue', chi'e:

—Ba chet bi' cha'na'. Ben goklen sho'gach wxoa noona' yichjbaa kwenche yiyakib' na' ibanchb'.

24Na' wyajlen Jesúza' le', na' ben' zan inleeb nogake'ne' axt bdakwyillgake'ne'. 25Na' ladj ben' zan walka' len to noolə ba gok shllin yiz chzoe' wbaa. 26Dii zan dii ba ben ble'ile' lao ben' wen rmechka', na' ba bliiayee yog' dii de che' na' bi gokkze' rmech, san gokxinlile'. 27Na' ka benile' xtill' Jesúza', jni'e ladj ben' zan walka' no le' na' jexee xe'na'. 28La' gokile': “La'ch' xe'na' she' ba bexaa, na' yiyakid'.” 29Na' katena' wlez wbaana' na' gokbe'ile' ba bigaa yillwe' che'na'. 30Na' gokbe'i Jesúza' bchej yel' wak che'na', na' biyechje' chi'e ben'ka':

—¿Noran bex' xa'na'?

31Na' ben'ka' non le' txen che'gake'ne':

—Ben' zan walan ndakwyill li'. ¿Biche nazo': “Non ba bex' nad'?”

32Na' ze Jesúza' chwie' ben'ka' lle' kwite'na' kwenche inezile' non bex' le'. 33Na'ch noola', daa ba gokbe'ile' biyakile', de chall chllerbzile' wdie' na' bchek' xibe'na' lawe'na' na' golle' le' doxen daa ba gok che'. 34Na' che' Jesúza'ne':

—Xiin', daa chonlilalloo nadaan ba biyakilo'. Biyaj mbalaz daa ba bigaa yillwe'na' bsak'zi' li'.

35 Na' ni chshaljte Jesúza' ka bllin to chop ben' wza' lill Jairona', chi'ene':

—Ba wit bi' cho'na'. Bich gonilo' maestroni zed.

36 Na' bi ben Jesúza' legake' kwent, na' golle' Jairona':

—Bi illebo'. Kon bxenilall' nad'.

37 Na' bi bi'e latj shajlen ben' yoblə le', lete Pédrona' na' chop bish'te, Jacóbona' na'ch Juanna'. 38 Na' ka bllingake' lill Jairona', ble'ile' le chakyeshii ben'ka' lle' na' na'ch chbellgake' na' le chosyaagake'. 39 Na' jabigüee gana' lle'gake' na' golle' legake':

—¿Berache chonzle dane na' chbellzle? Aga ba wit bi'do'nan', san cheszbaan.

40 Na' bxillgakile' Jesúza'. Na' bisheshe' yog'lölə' na' wyoolene' xaxna'baa na' ben'ka' zejlene' txen gana' de bi'do'na'. 41 Na' bexee na'baa na' golle'b':

—Talita, cumi^a —na' zejín: Bi' nooldo', nia' li' biyas.

42 Na' bi' nooldo'na' lii biyasteb' na' bidab', la' ba gokkzib' shllin yizan. Na' bibanchgayi ben'ka' lle' na'. 43 Na' Jesúza' bene' mandad kono ye'gake' daa gok, na' golle' legake' we'gake' dii gao bi'do'na'.

Billin Jesúza' yell Nazareta'

(Mt. 13:53-58; Lc. 4:16-30)

6 1 Na' biza' Jesúza' biyaje' lalle'na', na' ben'ka' nakgake'ne' txen zejlengake'ne'. 2 Na' ka bllin lla sabda', llana' chombaan ben' Israelka', wyaje' gana' chdop chllaggake' choe'lwillgake' Chioza' na' wzoloe' bli' bsdile' ben'ka' lle' na'. Na' zan ben'ka' bzenag xtilleena' bibangakile', na' che'gake':


—¿Gara jasedz beeni diiki, lla? ¿Gara za' ye'l' sin' che beeni, na' ye'l' wakka' chone', lla? 3 ¿Aaga beenin karpintera', beena' nak xiin Maríana', na' ben' bish' Jacóbona', Joséna', Júdaza' na'ch Simónna'? Na' lekzka' ben' zane'ka' zoagake' lallchoni.

Na' bi wyajle'gake' che'. 4 Na' che' Jesúza' legake':

—To ben' chyixjee daa che' Chioza'ne', gattez chgoogake'ne' balaan, san lall lille'na' aga no chgoo le' balaan.

5 Na' aga bitek ye'l' wak gok gone' na', lete xonjchga ben'

^a 5:41 *Talita, cumi*: dill'ki nakgakan dill' arameo.



¿Aaga beenin karpintera'? Mr. 6:3

w'e'ka' b̄xoá neena' yichje'ka' na' biyone' legake'. 6Na' bibanile' daa bi chajle' ben'ka' che'. Na' wde' bli' bsdile' ben'ka' lle' to to yelka' lliá gaozə yell Nazareta'.

Jesúza' bselee ben'ka' shllin llje'gake' cho'a xtill' Chioza'

(Mt. 10:5-15; Lc. 9:1-6)

7Na' wnie' ben'ka' shllin, na' bselee chop weje', na' bi'e legake' yel' wñabia' kwenche yibejgake' dii xiw'ka' yoo ben'. 8Na' golle' legake' bibi gox'gake' kat' koogake' nez; bi chiya! wa'gake' yixj ga koo xshinlaze'ka', ni dii gaogake', ni mech, san twejz yag bar gox'gake'. 9Na' shkwe'z xelgake' wlej, na' zi shkwe'z xe'ka' gawk. 10Na' chi'e legake':

—Yooná' gana' illinle, na'z soale axt ka illinch lla yiza'le. 11Na' yella' gana' bi wlebgake' le' ni bi wzenaggake' chele, ka yiza'le na', yishible bishtena' lliá ni'aleka' kwenche gakbe'gakile' aga wenan chongake' bi chlebgake' cho'a xtill' Chioza'. Dii li nia' le', kat' illin lla wchoglo Chioza' che ben', ben'ka' lle' yella' gana' bi wlebgake' le', ile'gakile' yel' zak'zi' xench aga ka ben'ka' wlle' yell Sodómana' na' yell Gomórrana'.

12Na' wza'gake' zjtixje'gakile' ben' chiyal' yiyaj yilengakile' saaxya che'ka'. 13Na' bibejgake' zan dii xiw'ka' yoo ben', na' bshongake' lat' wej seta' yichj ben'ka' bi shao' na' biyakgakile'.

Betgake' Juanna', beena' bchoa ben' nis

(Mt. 14:1-12; Lc. 9:7-9)

14Na' Heródeza', beena' wnabia' gana' mbani Galileana', benile' yog' daa chon Jesúza', daa le ba zeyi che'. Ba ben'ka' che'gake':
—Dii Juanna', beena' bchoa ben' nisan' ba biban, daan chone' ye! wakka'.

15Zi bale' che':

—Elíazan' ba biyed.

Na' zi bale' che':

—Nake' ben' chyixjee daa che' Chioza'ne', ka ben'ka' wzoa kani'yi.

16Ka beni Heródeza' dill'ki, na' chi'e:

—¿Beenan' dii Juanna', beena' ben' mandad wchog yichje'na!
¿Ba bibane' ladj ben' wetka'!

17La' kwinn Heródeza' bene' mandad bex'gake' Juanna' na' bseje'ne' lillyana' daa bseshlene'ne' daa bikee Herodíaza', xool ben' bishee, Felípena'. 18Juanna' golle'ne':

—Xya nllleb nakan bikoo xool ben' bishoona'.

19Na' bllaa Herodíaza' Juanna' na' goklallee wite'ne', per bibi gok gone' 20daa chlleb Heródeza' Juanna', daa nezile' nake' to ben' li ben' shao' ben' nak lall' na' Chioza', na' bi bi'e latj no bi goni le'. Na' la'kzi chakchoplallee che dill'ka' cho'e, bibaile' bzenague' che'. 21Per ka wyayi Heródeza' yiz, bene' to lni na' goxe' ben'ka' chnabia', na' xan soldadka', na' ben'ka' mbejlawin gana' mbani Galileana'. Na' got' xlatjin gon Herodíaza' ka cheenile'. 22Na' bi' nool wew' che Herodíaza' byaab' lao ben'ka' lle' lnina', na' le bibayi Heródeza' len ben'ka' chaolene' ka byaab'. Na' golle'b':

—Wnab bittezə cheenilo' na' gona'n.

23Na' bchebe' wi'eb' daa cheenib', la'kzi axt gashj gana' chnabi'e wi'eb'. 24Na' bichejb' janabib' xna'baa:

—¿Bera ka inab', lla?

Na' che' xna'baa:

—Wnab yichj Juan wichoa nisa'.

25 Na' lii biyooteb' gana' chi' Heródeza', na' che'b':

—Cheenid' yichj Juanna' to lo plat lilij naate.

26 Na' le gokyeshii Heródeza', per daa ba bcheble' lao yog' ben'ka' goxe', bi goklallee wllonile'b' daa chnabib' le'. 27 Na' lii bsel'tie' to soldad jachogue' yen Juanna' loo lillyana' 28 na' bllie' yichje'na' to lo plat. Na' bi'en bi' nool wewaa na' leb' be'baan xna'baa.

29 Ka wnezi ben'ka' nak Juanna' txen, na' jaxi'gake' kwerp che'na' na' jakwash'gake'ne'.

Bwao Jesúza' gayaa mil ben'

(Mt. 14:13-21; Lc. 9:10-17; Jn. 6:1-14)

30 Ka billin postlka' gana' zoa Jesúza', na' gollgake'ne' yog' diika' jengake' na' daa jali' jasedgakile' ben'. 31 Na' che' Jesúza' legake':

—Li sho' shajcho ga kono ben' lle' kwenche yizi'lall'lat'cho.

Golle' ka' daa le chdia chllag ben' zan lawe'ka', na' ni bi chak latj gaogake'. 32 Na' wyoogake' to barkw wyajgake' ga kono ben' lle'. 33 Na' ben' zan ble'gakile' ka wza'gake' na' biyombia'gake' legake', na' wza'do ben'ka' lle' to to yell zejdogake' gana' illin barkwa' na' nechlagake' bllin. 34 Na' ka bichej Jesúza' loo barkwa' ble'ile' ba bdi'a bllag ben' zan inleeb na' biyesh'lallile' legake' daa nakgake' ka xil'do', ba kono xanin zoa. Na' wzoloe' dii zan dii bli' bsdile' legake'. 35 Na' ka wlle', ben'ka' nakgake'ne' txen wbig'gake' lawe'na' che'gake'ne':

—Ba wlle' naa, na' gani lle'cho kono zoa wit' dii gaocho.

36 Goll ben'ki' yiyajgake' ranshka', na' yellka' llia gaozə kwenche lljxi'gake' daa gaogake'.

37 Na' che' Jesúza' legake':

—Len', li we' dii gaogake'.

Na' che'gake'ne':

—¿Nakra gonnto' lljxi'nto' yetxtilka' gao yog' ben'ki? la' wyejljain che chop guiyoa lla che laxj ben'.

38 Na' che' Jesúza' legake':

—Li lljawia ka'k' yetxtilka' nagle.

Na' ka wnezgakile' ka'ka'n de, na' che'gake'ne':

—De gayaan, na' zi chop bel.

39Na'ch goll Jesúza' legake' kwekgake' xonj wej ben'ka' lo yixa'. 40Na' wche' to guioa wejgake' na' shiyon wejgake'. 41Na' bex' Jesúza' yetxtilka' gay' na' belka' zi chop na' blis jalawe'na' yabalə bi'e Chioza' yel' choxken, na' bxoxje' yetxtilka' bi'en ben'ka' nakgake'ne' txen kwenche be'gake' che che ben'ka'. Na' lekzka' yog'gake' be'gake' belka'. 42Na' yog'lolgake' wdaogake' ka beljgakile'. 43Na' postlka' bitopgake' yetxtilka' len belka' bichoonan, na' biyakan zi shllin xet'. 44Na' ben'ka' wdao, to ben' byoka'zə gogkake' gayaa mil.

Jesúza' wzee lo nido'na'

(Mt. 14:22-27; Jn. 6:16-21)

45Na' ka wde, bigoo Jesúza' ben'ka' nakgake'ne' txen loo barkwa' kwenche yibialogake' lawe'na' yiyajgake' Betsáidana' daa lliá zi shlaa nido'na', shlak bisee ben'ka' bdi'a bllag na'. 46Na' ka biya ben'ka' billesh, na' wyaje' lo yaana' jelwille' Chioza'. 47Na' ka gol, ba zej barkwa' gchol nido'na' na' stoz Jesúza' bgaane' gana' biza'n. 48Na' ble'ile' le chllaglogaken' daa za' be'na' gana' zejləgake'. Na' ni bal wlo'e nez tlo nido'na' zeje' gana' ziyajgake'. Na' ba zoa yidie' lawe'ka' 49ka ble'gakile'ne' zeje' tlo nido'na' na' gogkakile' yel bəxenzan. Na' besyaagake' 50daa le bllebgake' daa ble'gakile'. Na' lii wnetie' legake', chi'e:

—Bi illeble, nad'kzan.

51Na' biyep'e loo barkwa' na' wche'lli be'na'. Na' le bibangakile', 52la' aga ba wyajni'gakile' yel' waka' daa bene' che yetxtilka' daa gogkake' ben' lall'do' wal.

Jesúza' biyone' ben'ka' bi shao'

gana' mbani Genesareta'

(Mt. 14:34-36)

53Na' ka biyoll wdegake' lo nido'na' na' bllingake' yell-lío daa mbani Genesareta', na' bda' barkw che'ka' yag cho'a nido'na'. 54Ka bchejgake' loo barkwa', lii biyombia'te ben' Genesaretka' Jesúza'. 55Na' wdadogake' doxen gana' mbani lalle'ka' btopgake' ben' bi shao', na' lo daazə nxoagake' legake' chjwa'gake' legake' gana' nezgakile' bllin Jesúza'. 56Na' gattezə chaje' laa yelldo'ka' laa yell xenka', wa laa ranshka', chyixjgake' ben'ka' bi shao' tneza'

gana' chdie'. Na' chat'yogakile'ne' wi'e latj gox'gake' la'ch' xe'na'. Na' yog' ben'ka' gok bex'gake'n biyakgakile'.

Diika' chxinj chlenan yichjlall'do'chona'

(Mt. 15:1-20)

7 ¹Fariseoka' len zi bał ben'ka' chli' chsedi leya', ben'ka' zaak Jerusalénna', bllingake' lao Jesúza'. ²Na' ka ble'gakile' bał ben'ka' nak Jesúza' txen bi bixis biyib neeka' ka zi' gaogake', na' wdaogake' xya chegake'. ³(La' fariseoka' len yog'z ben' Israelka' ni nogake' daa bli' bsemi dii xoxztoe'ka' legake' nan bi gak gaogake' shi bin' yixis yiyib neeka'. ⁴Na' ka chiyoll chajgake' lao yaana' shi bi yixis yiyib neeka' bi gak gaogake'. Na' lekzka' chixis chiyibgake' diika' cheej chaogakile'. Na' dii zanch diika' yoologake' chongake'.) ⁵Na' fariseoka' len ben'ka' chli' chsedi leya' wñabgakile' Jesúza', che'gake':

—¿Biche bi chon ben'ki nako' txen ka bli' bsemi dii xoxzto'choka' cho'?, la' bi chixis chiyib neeka' kat' cheej chaogake'.

⁶Na' che' Jesúza' legake':

—Kwasłol inlleban wne dii Isaíaza' chele, le' ben' wxiye', kana' bzeje' daa na:

Ka nak ben'ki, de cho'a dill'zan choe'la'ogake' nad',

na' aga choe'la'ogake' nad' do yichj do lall'gake'.

⁷Bibi zjanayin chongake' ka choe'la'o nad';

na' daa chli' chsedgakile' nakan dii chyiljlall'z ben'.

⁸Na' le' chbej yichjle daa nllia Chioza' bia' gonle kwenche gonle daa chyiljlall' ben' yell-lioni.

⁹Na' lekzka' golle' legake':

—Chzoale ka'lə daa nllia Chioza' bia' gonle kwenche gonle daa bli' bsemi dii xoxzto'leka' le'. ¹⁰Moiséza' wne': “Li koo xaxna'lena' balaan”, na' “Beena' ine zban che xaxneena' chiya' guete.” ¹¹Na' le' choe'le latj yee ben' xaxneena': “Bi gak gaklen' le', la' yog' dga de cha' ba ncheb' wi'an Chioza'.” ¹²Na' daa nale ka', bich chonle byen gaklen ben' xaxneena'. ¹³Na' daa chonle ka', chzoale cho'a xtil' Chioza' ka'lə kwenche chonle daa bli' bsemi dii xoxzto'leka' le'. Na' dii zanch ka dga chonle.

14Na' wne Jesúza' yog' ben'ka' lle' na', na' golle' legake':

—Li wzenag dga inia' le', na' li shajniin: 15Aga daa cheej chao ben' yell-lionin chxinj chlenan le'. San daa chalj chxe loo yichjlall'do'enan' chxinj chlenan le'. 16Ka le' chenile dga nia', li sen wneyi.

17Na' ka bikwase' kwit ben'ka' lle' na' biyo'e loo yooná' gana' zoagake', na' ben'ka' nakgake'ne' txen wñabgakile'ne' bi zejín daa golle' ben'ka'. 18Na' golle' legake':

—¿Ani le' bi chajniilen? ¿Abi chajniile aga daa cheej chao banaan chxinj chlenan le'? 19La' aga loo yichjlall'do'enan' illinan, san loo li'enan' ljche'n, na'tech yichejan.

Na' daa golle' ka', zejín bittezə yel' wao wak yeej gaocho. 20Na' lezkza' golle':

—Daa chchej loo yichjlall'do' ben' yell-lioni, lennan' chxinj chlenan le'. 21La' loo yichjlall'do'ekan' chalj chxe diiki bi nak wen: yel' chza'lall' mal, yel' chnelen ljwellin, yel' chiyit ljwellin, 22yel' wban, yel' wzelall', yel' wen dii mal, yel' wxiye', yel' wenlen kwerp cheyinna' daa bi nxe bi nzak', yel' xe', yel' wyilj wzan dill' che ben', yel' chep cha'lall', na' yel' nchoł nniit. 23Yog'loł dii malki chalj chxegakan loo yichjlall'do' ben' na' chxinj chłengakan legake'.

To noolə bi nake' ben' Israel benilallee Jesúza'

(Mt. 15:21-28)

24Na' biza' Jesúza' gana' wzoe' na' ziyaje' gana' mbani yell Tírona' na'ch yell Sidónna'. Na' blline' to yoo na' bi goklallee no inezin, per bi gok wkwashee. 25Na' to noolə, ben' zoa to bi' nool che' yoob' dii xiwaa, ka wnezile' bllin Jesúza', lii wyajtíe' jaček' xibe'na' lawe'na'. 26Na' noola' nake' ben' griego, na' golje' gana' mbani Sirofeníciana'. Na' got'yoile' Jesúza' yibeje' dii xiwaa yoo bi' nool che'na'. 27Na' goll Jesúza' le':

—Yog'zə ben' zigaate chwawe' xiine'ka'. La' bi nakan wen koyocho daa chao xiinchoka' na' wzał'chon lao bekw'ka'.

28Na' che' noola' le':

—Lekzilo'n, ben'do', per bekw'ka' chbe'gakb xan mesa' na' chitopgakb blaaka' chxop.

29Na'ch golle'ne':

—Ni che dillii ba bi'o, biyaj mbalaz. Ba bichej dii xiwaa yoo bi' cho'na'.

³⁰Na' ka billin noola' lille'na', ble'ile' bi' nool che'na' deb' lo blaga' na' ba bichej dii xiwaa wyoob'.

Biyon Jesúza' to ben' kwell na' bi chak inetie'

³¹Na' biza' Jesúza' gana' mbani Tírona' na' bidie' yell Sidónna' na' billine' gana' de nisdó' che Galileana', gana' mbani Decápoliza'.

³²Na' jwa'gake' lawe'na' to ben' kwell na' leyi bi cha'yen' inje', na' got'yogakile'ne' w_xoa neena' yichje'na'. ³³Na' bche' Jesúza'ne' ka'lə' gana' kono lle', na' bne' xbene'na' loo nague'na', na' bllaa xeneena' lo xbene'na', bshile'n lo lol' beena'. ³⁴Na' blis jalawe'na' cha'lə', wkaalallee, na' golle'ne':

—¡Éfata! —zejin: ¡Byalj!

³⁵Na' lii byaljte nague'na', na' gok bita lolleena' na' bishalje' wen. ³⁶Na' che' Jesúza' ben'ka' ble'i kono ye'gake' ka'. Na' la'kzi golle' legake' ka', zizikli bzegake'n dill'. ³⁷Na' le bibangakile', che'gake':

—Yog'lolte chak gon beeni, chiyone' ben'ka' bi cheni, na' ben'ka' bi chak ine, chone' ka chnégake'.

Jesúza' bwawe' tapa mil ben'

(Mt. 15:32-39)

8 ¹Do kana', ben' zan inleeb bdop bllag. Na' daa bibi de yeej gaogake', wne Jesúza' ben'ka' nakgake'ne' txen chie' legake':

²—Chiyeshid' ben'ki, la' ba gok shon lla zoalengake' nad' na' bibi de yeej gaogake'. ³Na' shi yiselaa legake' bi neej naogake', xoll ichol-lall'gake' tneza', la' balgake' za'gake' zit'.

⁴Na' ben'ka' nakgake'ne' txen che'gake'ne':

—¿Gatg lljxi'cho dii gao yog' ben'ki?, la' gani lle'cho kono zoa wit' dii gaocho.

⁵Na' che' Jesúza' legake':

—¿Ka'k' yetxtilka' noa'le?

Na' che'gake'ne':

—Gallan.

6Na' bene' mandad kwe' ben'ka' lo yona', na' bex̄ee gallte yetxtilka', na' ka biyoll bi'e Chioza' ye! chox̄ken, na' bxx̄oje'n na' bi'en ben'ka' nakgake'ne' txen kwenchē chisgake' chē chē ben'ka'. 7Na' lekzka' nox̄'gake' zto chop bel. Na' bi'e Chioza' ye! chox̄ken, na' golle' ben'ka' nakgake'ne' txen we'gake' chē chē ben'ka'. 8Na' yog'lol'gake' weej wdaogake' axt ka beljgakile', na' bitopgake' zi gall xet' diika' bichoonan. 9Ben'ka' weej wdao gogkake' ka tapa mil. Na' Jesúza' bisee legake' 10na' bizee biyoolene' ben'ka' nakgake'ne' txen loo barkwa' na' ziyajgake' gana' mbani Dalmanútana'.

Fariseoka' goklall'gake' gon Jesúza' to ye! wak lawe'ka'

(Mt. 16:1-4; Lc. 12:54-56)

11Na' bllin fariseoka' na' wzologake' chakguedlengake' Jesúza'. Na' daa goklall'gake' wchix̄gake'ne', wñabgakile'ne' gone' to ye! wak lawe'ka' kwenchē gakbia' shi Chioza'kzan bseleene'. 12Na' Jesúza' axt wkaalallee, golle':

—¿Berachē le' zoale naa chñabzle gon' to ye! wak dii ile'ile'? Dii li nia' le', aga bi ye! wak gon' ile'ile'.

13Na' bizee kwite'ka', na' biyo'e loo barkwa' sto shii ziyaje' shlaa niso'dna'.

Dill' wxiye' chē fariseoka' zaklebin levadúrana'

(Mt. 16:5-12)

14Na' ben'ka' nak Jesúza' txen gol-lall'gake' wa'gake' yetxtil che'ka', na' tlish'chga dii noa'gake' loo barkw che'ka'. 15Na' che' Jesúza' legake':

—Wsak'gale bi shajle'le dill' wxiye' chē fariseoka' na' chē Heródeza', daa zaklebi levadúrana'.

16Na' ben'ka' nakgake'ne' txen che' ljjwellgake':

—Daa bi bi'acho yetxtilan' ne' ka'.

17Na' gokbe'i Jesúza' dillaa choe'gake', na' golle' legake':

—¿Berachē chakzile daa bi bi'ale yetxtilan' nia' ka'? ¿Abin' shajni'kzile' ni bin' gakte'ile ka nak diika' chon'? ¿Abin' iyalj yichjlall'do'lenan'? 18Zoate jalaoleka' na' bi chle'ile, na' zoate nagleka' na' bi chenile'. ¿Abi chjadinile ka ben'? 19Kana' bxx̄oj'

gay' yetxtilka' na' wdao beṅ'ka' gaya' mil, ¿baḷ xet' diika' bichooṅan?

Na' gollgake'ne':

— Shllinān.

20—Na' kana' bxoḵj' gall yetxtilka' na' wdao beṅ'ka' tapa mil, ¿baḷ xet' diika' bichooṅan?

Na' che'gake'ne':

—Zi gallan.

21 Na' che' Jesúza' ḷegake':

—¿Ana' ni ka' biṅ' shajni'kzile?

Jesúza' biyone' to beṅ' ḷchoḷ yell Betsáidana'

22 Na' bllingake' yella' le Betsaida, na' beṅ'ka' lle' yella' jwa'gake' to beṅ' ḷchoḷ lao Jesúza' na' got'yogakile'ne' gox'gache'ne'. 23 Na' beḵ' Jesúza' na' beṅ' ḷchoḷa' na' wleje'ne' yella'. Na' bllē' xeneena' jalawe'na' na' bḵoa neena' yichje'na', na' wṅabile'ne' shi ba chle'ile'. 24 Na' che' beṅ' ḷchoḷa':

—Chle'id' xonj beṅ', na' nakgake' ka yag dii chza'.

25 Na' Jesúza' beḵee jalawe'na' sto shii, na' biyakile'. Na' ble'ile' kwasḷol yog'ḷolte. 26 Na' bisel' Jesúza'ne' shḷicha lille'na', chi'ene':

—Bi lljayoo dill' yella'.

Pédrona' bi'e dill' Jesúzan' nake' Crístona'

(Mt. 16:13-20; Lc. 9:18-21)

27 Na' biza'len Jesúza' beṅ'ka' nakgake'ne' txen wyajgake' yellka' mbani Cesarea de Filípona'. Na' shlak ngoogake' nez, wṅabile' ḷegake', chi'e:

—¿Non na beṅ' nak'?

28 Na' che'gake'ne':

—Balgake' nagake' lin' dii Juanna', beena' bchoa beṅ' nisa', na' zi balgake' nagake' lin' Elíaza', na' zi balgake' nagake' nako' sto beṅ' wdixjee daa goll Chioza'ne' kani'yi.

29 Na' chi'e ḷegake':

—Shera le', ¿nora nale nak'?

Na' che' Pédróna':

—Lin' Crístóna', beena' ncheb Chioza' wselee.

30 Na' che' Jesúza' ḷegake' kono ye'gake' ka'.

Jesúza' cho'e dill' guete'

(Mt. 16:21-28; Lc. 9:22-27)

³¹Na' wzolo Jesúza' bli' bsdile' legake' nan le', Ben' Bsel' Chioza' Yell-lioni, chonan byen sak'zi'e dii xen, na' ben' golka' chñabia' na' bñozka' chñabia' na'ch ben'ka' chli' chsedi leya' gakzbangakile'ne', na' chonan byen witgake'ne' na' yibane' ka gak shon lla. ³²Na' bshaljlene' legake' kwaslol daa gak che'. Na'ch wlej Pédrone'ne' ka'lə na' wzolo golle'ne' bi koo cho'e daa. ³³Na' biyechj Jesúza' chwie' ben'ka' nakgake'ne' txen, na' bsheshlene' Pédrone', chi'ene':

—¡Kwas ka'lə, Satanás!, la' bi chajniilo' daa cheeni Chioza' gone', san de yell-liozan chajniilo'.

³⁴Na' wñe Jesúza' ben'ka' nakgake'ne' txen len ben'ka' lle' na', na' chi'e:

—Shi no cheeni gake' nad' txen, chiyal' wsanlall' kwine' na' izanile' yel' mban che'na' yen ile'ile' bittez ni cha', na' gone' ka chazlallaa. ³⁵La' beena' bi chzanile' yel' mban che'na', beenan' kwiayi', san beena' chzanile' yel' mban che'na' ni cha' na' ni che dill' wen dill' kob cha'na', beenan' gat' to yel' mban che' zejli kani. ³⁶Bibi zjanayin gap ben' yog'lol daa de yell-lioni, shi le' kwiayee. ³⁷Na' aga zakii chixje' kwenche yisla yel' mban che'na'. ³⁸Nottezə beena' chido'i wchebe' nombi'e nad' wa wi'e cho'a xtillaana' lao ben' saaxyaka' ben'ka' bi chonlilall' nad', ka'kzə nad', Ben' Bsel' Chioza' Yell-lioni, yiyii yido'id' le' kat' yiyedlen' anjl cha'ka' na' zinsa' balaan xen che Xa' Chioza'.

9 ¹Na' lezkza' golle' legake':

—Dii li nia' le', bal-le lle'leni, ni mbanle ile'ile ka chñabia'len Chioza' yel' wak xen che'na'.

Jesúza' biyake' nlla'lə

(Mt. 17:1-13; Lc. 9:28-36)

²Wde xop lla, Jesúza' wyaje' to lo yaa sibə, na' bchi'e Pédrone', Jacóbona' na'ch Juanna'. Na' lawe'ka' biyake' nlla'lə. ³Na' xe'na' axt chep cheeni'n, na' biga zoa ben' chibe'n xtil inlleb ka gokan. ⁴Na' ble'gakile' Elíaza' na'ch dii Moiséza' chshaljlengake' Jesúza'. ⁵Na' che' Pédrone' Jesúza':

—Maestro, ¿wēn inleeb zoacho ni! Gonnto' twej ransh chele, to cho', to che dii Moiséza', na' sto che Elíaza'.

6Kon bi billet-lallee golle', daa chllebchagagake'. 7Na' wze to bej bkwashaan legake', na' loo beja' wne Chioza', chi'e:

—Beenin xiinaa, na' le chakidee. Li wzenag che'.

8Na' ka bwiagake' gana' wle' ben'ka' shon, stoz Jesúza' ze.

9Na' shlak chiyetjgake' lo yaana', goll Jesúza' legake' kono ye'gake' daa ble'gakile' axt kat'ch le', Ben' Bsel' Chioza' Yellioni, ba bibane' ladj ben' wetka'. 10Na' daa golle' ka', ni to kono ben' yoblə gollgake' daa ben ble'gakile', la'kzi wñabi ljwellgake', bi zejin daa golle' yibane' ladj ben' wetka'. 11Na' wñabgakile' Jesúza', che'gake'ne':

—¿Biche naz ben'ka' chli' chsedi leya' nan zigaate Elíazan' yiyed?

12Na' chi'e legake':

—Dii li, Elíaza' yide' zigaate yidgwee xnezi yog'lolte. ¿Abi nezile biche Cho'a Xtill' Chioza' nan Beena' Bsel' Chioza' Yellioni chonan byen sak'zi'chgue' na' gakzbani ben' le'? 13Na' nia' le', ba biyed Elíaza', na' bengakile'ne' daa nazan chegake', kon ka na Cho'a Xtill' Chioza' gongake' che'.

Biyon Jesúza' to bi' yoo dii xiw'

(Mt. 17:14-21; Lc. 9:37-43)

14Na' ka billingake' gana' lle' ben'ka' sto, ben'ka' nakgake'ne' txen, na' ble'gakile' lle' ben' zan inleeb kwite'ka', na' len bal ben'ka' chli' chsedi leya' chakguedlengake' legake'. 15Na' ben'ka' lle' na' ka ble'gakile' Jesúza', bibangakile' na' wza'dogake' jawapgake'ne' chiox. 16Na' chi'e legake':

—¿Bi cheyin chakguedlenile ben'ka'?

17Na' to beena' len ladj ben'ka' lle' na' chi'ene':

—Maestro, ni ba nchi'a bi' cha'ni lawo'ni, la' yoob' to dii xiw' na' chllonan ineb'. 18Gattezə chdab' dii xiwaa choxa'n leb' na'ch chchoonan leb' lo yona'. Na' chbia bllin' cho'abaa, na' chaoxaxj leybaa na' chzecha kwerp che'baa. Na' ba gosh' ben'ki nako' txen yibejgake' dii xiwaa yoob', per bi chakgake'.

19Na' che' Jesúza' legake':

—¿Le' ben' bi chajle'? ¿Zi' ka'k'tek chiyal' soalen' le'? ¿Zi'

ka'k'tek chiyal' soid' le'? Li lljxi'shki'b' ni.

20Na' jwa'gake'b' lawe'na'. Na' ka ble'i dii xiwaa Jesúza', benan ka wyazb' shona'. Na' billeeb' lo yona' na' wbix wtolb' na' wllia bllin'na' cho'abaa. 21Na' wñabi Jesúza' xabaa, chi'e:

—¿Batrate wzolo chakb' ki?

Na' che' xabaa:

—Kana' nakteb' bi'do' chakb' ka'. 22Na' zan shii ba bzal' dii xiwaab' lo yi'na' na' loo nisa' kwenche witan leb'. Na' shi wak yiyono'b', biyesh'lall'gachi neto' na' goklengach neto'.

23Na' che' Jesúza':

—¿Biche nazo' shi wak'?, la' beena' chonlilall' Chioza' aga bi dii lalj gat' che'.

24Na' besyaa xabaa, chi'e:

—Chonlilallaane'. ¿Goklen nad' gonlilall'chee!

25Na' ka ble'i Jesúza' ba chdop chllag ben' zan inleeb, na' bsheshlene' dii xiwaa, chi'en:

—Dii xiw', lin' chono' kwenche bi cheni bi'ni ni bi chak ineb', nad' nia' li', bichej, na' bich gak yiyoo sto shii.

26Na' besyaa dii xiwaa, na' bxizan leb' zibia' wal na' bichejan, na' gotb' ka bi' wet. Na' ben' zan wnagake': "Ba witb'." 27Na' bex' Jesúza' na'ba' kwenche bisolleeb'.

28Na' ka biyoo Jesúza' to loo yoo, ben'ka' nakgake'ne' txen wñabgakile'ne' to lezgake', che'gake':

—¿Berache bi gok yibejnto' dii xiwaa?

29Na' chi'e legake':

—Kwenche gak yichej dii xiw' ka dga, chiyal' soale wbas' na' we'llwill-le Chioza'.

Jesúza' sto shii cho'e dill' guete'

(Mt. 17:22-23; Lc. 9:43-45)

30Na' biza'gake', na' bidegake' gana' mbani Galileana'. Na' Jesúza' bi goklallee no inezi gan zoagake' 31daa chzajniile' ben'ka' nakgake'ne' txen. Na' chi'e legake':

—Nad', Ben' Bse! Chioza' Yell-lioni, gon ben' nad' lo na' ben' malka' na' witgake' nad', na' ka gak shon lla, yiban' ladj ben' wetka'.

32Na' bi wyajni'gakile' daa chi'e legake', na' bi biyaxjgakile'

inabgakile'ne' bi_{che} che'ze' ka'.

¿Noran zak'chi?

(Mt. 18:1-5; Lc. 9:46-48)

33Na' billingake' yell Capernaúma'. Na' ka billingake' gana' zoagake', na' chi'e legake':

—¿Bi cheyin chakguedzle shlak zingoocho neza'?

34Na' ni togake' bi w_{ne}, daa gokguedgake' che noyen'gaken' nak ben' zak'chi. 35Na' wche' Jesúza' na' goxe' ben'ka' shllin, chi'e legake':

—Shi nole cheenile gakle ben' zakii, chiyal' gon kwinle ka wen llin che ben'.

36Na'ch bzoe' to bi'do' ladje'ka'. Na' blene'b' chi'e legake':

37—Nottezə ben' wlebe' to bi'do' ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsej' nad'.

Beena' bi chakzbani cho', txenkzan nake' cho'

(Lc. 9:49-50; Mt. 10:42)

38Na' che' Juanna' le':

—Maestro, ba ble'into' to ben' chzetje' lio'na' kwenche chibeje' dii xiw'ka' yoo ben' na' blonnto' gone' ka', la' bi nake' cho' txen.

39Na' che' Jesúza':

—Bi wllonle gone' ka', la' beena' chzetj lia'na' kwenche chone' yej' wak, aga wak inie' zban cha'. 40La' beena' bi chakzbani cho', txenkzan nake' cho'. 41Na' nottezə beena' gone' le' la'ch' lat' nis yeejle daa nakle nad' txen, dii li nia' le', de dii si'e banez.

Diika' gon ka ibixcho lao dii mala'

(Mt. 18:6-9; Lc. 17:1-2)

42'Nottezə beena' gon ka ibix to ben' zi' chzolo chonlilallee nad', naklan wen wwal'gake' yene'na' to yaj che molinna' na' lljaza'gake'ne' loo nisdona' aga ka daa gone' ka ibix ben' lao dii mala'. 43Na' shi noona' chonan ka ibixo' lao dii mala', bchogan. Wenchlan bi de noona' tlaa yillino' kwit Chioza' aga ka daa yiyaj doxentio' lo yi' gabila' daa biga yiyol, 44gana' ni

bzogaa bi chet ni biga chiyol yi'na'. ⁴⁵Na' shi ñi'ona' chonan ka chono' to dii mal, b̄hogan. Wenchlan bi de ñi'ona' t̄laa yillino' kwit Chioza' aga ka daa yiyaj doxentio' lo yi' gabīla', ⁴⁶gana' ni bzogaa bi chet ni biga chiyol yi'na'. ⁴⁷Na' shi jalawo'na' chonan ka chono' to dii mal, wlejan. Wenchlan bi de jalawo'na' t̄laa yillino' gana' zoa Chioza' ch̄nabi'e aga ka daa yiyaj doxentio' lo yi' gabīla', ⁴⁸gana' bi chet bzogaa ni biga chiyol yi'na'.

⁴⁹Ka yog'te diika' chzangakile' choe'gake' Chioza' chgoogake'n zed', ka'kzan yog'te beñ'ka' nonl̄ilall' nad' yen ile'gakile' ye'l zak'zi'na' yell-lioni. ⁵⁰Zedaa nakan dii wen, per shi bich nakan zxi', aga wakch yiyonchon zxi' dii yoblə kwen̄che w̄chinchon. Chiyal' soalen l̄jwell-le mbalaz, na' shi gonle ka', nakle ka ye'l wao daa yoo zed' na' sian.

Bi chiyal' yilaa beñ'ka' nshagna'

(Mt. 19:1-12; Lc. 16:18)

10 ¹Biza' Jesúza' Capernaúma' ziyaje' gana' mbani Judeana' na' lo yell-liona' daa de sh̄laa yao Jordánna'. Na' bizdi'a bizllag beñ' zan lawe'na' na' wzoloe' chli' chsedile' legake' kon ka ba yooloe' chone'. ²Na' ba l̄ fariseoka' wbig'gake' lawe'na', na' kwen̄chezə wchixgake'ne' w̄nabgakile'ne' shi de lsens yilaa xool beñ'. ³Na' chi'e legake':

—¿Bin bllia dii Moiséza' bia' gonle?

⁴Na' che'gake'ne':

—Dii Moiséza' bi'e latj yichoon beñ' byona' xoolo'na' na' wi'ene' to yish daa cho'e dill' ba bilaagake'.

⁵Na' che' Jesúza' legake':

—Dii Moiséza' bllie' bia' gonle ka' daa nakle beñ' widenag.

⁶Per dii nech ka wx̄e wzil yell-lioni, Chioza' “bene' beñ' byona' na'ch noola.” ⁷“Daan, beñ' byona' w̄lee x̄ax̄neena' kwen̄che soalene' xoolo'na' ⁸na' gaggake' toz.” Na' bich nakgake' ch̄op, san ba nakgake' toz. ⁹Na' beñ'ka' ba non Chioza' toz, ni to beñ' yell-lio bi chiyal' yilēe legake'.

¹⁰Ka billingake' yoonā' gana' zoagake', beñ'ka' nakgake'ne' txen w̄nabgakile'ne' ch̄eyi daa golle' ka'. ¹¹Na' che' Jesúza' legake':

—Beena' yilee nool che'na' na' yishagnee nool yoblə, chone' ka beena' zoakzə nool che' na' chdalene' nool yoblə. ¹²Na' shi noola' yilee beñ' che'na' na' yikee beñ' yoblə, chone' ka beena' zoakzə beñ' che' na' chdalene' beñ' yoblə.

Jesúza' chonleeye' bi'do'ka'

(Mt. 19:13-15; Lc. 18:15-17)

¹³Na' bal beñ' jwa'gake' bi'do' che'ka' lao Jesúza' kwenche wxoə neena' yichjb'ka' na' gonleeye' legakb'. Na' beñ'ka' nakgake'ne' txen wzologake' chsheshlengake' beñ'ka' zjwa' bi'do'ka'. ¹⁴Na' ka ble'i Jesúza' chsheshlengake' beñ'ka', bllee na' chi'e legake':

—Li we' latj yid bi'do'ki lawa'ni, bi wllonle, la' Chioza' chnabile loo yichjlall'do' beñ'ka' nak ka legakb'. ¹⁵Dii li nia' le', beena' bi yiyak yichjlall'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

¹⁶Na' blene' bi'do'ka', na' bxoa neena' yichjb'ka' na' benleeye' legakb'.

To bi' wew', bi' wni'a, bshaljem' Jesúza'

(Mt. 19:16-30; Lc. 18:18-30)

¹⁷Ka ba chiza' Jesúza' yigwee nez, blindo to bi' wew' bchek' xibbaa lawe'na' che'bee:

—Maestro, li' nako' beñ' wen. ¿Beran chiya' gon' kwenche gat' to yel' mban cha' zejli kani?

¹⁸Na' che' Jesúza' leb':

—¿Berache nazo' nad' beñ' wen? Toz Chioza' nake' beñ' wen. ¹⁹Ba nezczilo' daa nllia Chioza' bia' goncho: “Bi wito' beñ', bi soaleno' nool bi nak nool cho', bi kwano', bi chiljlaloo bizə gon ino' che beñ', ni bi siyoo, na' wdap balaan xaxnoo.”


²⁰Na'ch che'bee:

—Maestro, kana' naktia' bi' xkwid' chon' yog' diika'.

²¹Na' bwia Jesúza' leb' kon yel' chaki, chi'e:

—Stozə daa chyallj gono': jayet' yog' dii de cho' na' be'n beñ' yesh'ka', na' gat' to yel' shao' cho' yabana'. Na' da dino' nad'.

²²Na' gokyeshii bi' wni'ana' ka golle'b' ka'. Na' ziyajb' chakyeshib' daa nakb' bi' wni'a xen inleeb.



*Lobe'ch te to kamey to xan yesh' aga ka to beṅ' wni'a
yilline' yabana' gana' chṅabia' Chioza'. Mr. 10:25*

23 Na' bwia Jesúza' beṅ'ka' lle' na', na' chi'e beṅ'ka' nakgake'ne' txen:

—¡Lallj inleeb chonan che beṅ' wni'aka' we'gake' latj inabia' Chioza' legake'!

24 Na' bibani beṅ'ka' nakgake'ne' txen daa golle' ka'. Na' chizi'e legake':

—Le' xiindawaa, chonan lallj che beṅ' wni'ana' yilline' yabana' gana' chṅabia' Chioza'. 25 Lobe'ch te to kamey to xan yesh' aga ka to beṅ' wni'a yilline' yabana' gana' chṅabia' Chioza'.

26 Ka bengakile' golle' ka', zizikli bibangakile', na' che' ljwellgake':

—¿Notg gak yillin lao Chioza', shka'?

27 Na' bwia Jesúza' legake' chi'e:

—Ni to beṅ' yell-lio bi gak gone' dga, per Chioza' aga bi dii lallj che' de, la' yog'loṽte chak gone'.

28 Na' Pédrona' chi'ene':

—Neto' ba wlej yichjnto' yog'lol dii napnto' kwenche nonnto' li' txen.

29 Na' che' Jesúza':

—Dii li nia' le', nottezə beṅ' ba bzanile' no lille', no xaxnee, no beṅ' bishee, no beṅ' zane', no xiin xoole', no yell-lio che'

ni cha' nad' na' ni che dill' wen dill' kob cha'na', ³⁰lo yell-lioni Chioza' yiyo'ene' dii zanch ka diika' wlej yichje', no lille', no ben' bishee, no ben' zane', no xiine', no yell-lío che' la'kzi chiya dii wsak'zi' ben' le', na' illin lla gat' to yel' mban che' zejli kani. ³¹Per ben' zan nakgake' ben' zakii naa, wllin lla bich bi sak'gake', na' ben' zan bi nakgake' ben' zakii, wllin lla gakgake' ben' zakii.

De wyon shii Jesúza' cho'e dill' guete'

(Mt. 20:17-19; Lc. 18:31-34)

³²Ka ziyajgake' Jerusalénna', na' zillialo Jesúza' lao ben'ka' nakgake'ne' txen. Na' le chibangakile', na' ben'ka' zinoch le' le chllibgake'. Na' bche' Jesúza' ben'ka' shllin ka'lə na' wzoloe' cho'e dill' lawe'ka' daa gak che', ³³chi'e legake':

—Ba gokbe'kzile' ba ziyajcho Jerusalénna', na' nad', Ben' Bsel' Chioza' Yell-lioni, gongake' nad' lo na' bhozka' chnabia' na' ben'ka' chli' chsedi leya', na' wchoglogake' cha' guet' na' gongake' nad' lo na' ben' zit'ka'. ³⁴Na' wtitjgakile' nad', na' wlla' xeneeka' nad', na' wit chingake' nad', na' witgake' nad'. Na' ka gak shon lla yiban' ladj ben' wetka'.

To dii wñab Jacóbona' len Juanna' lao Jesúza'

(Mt. 20:20-28)

³⁵Na' Jacóbona' len Juanna', ben'ka' nak xiin Zebedewa', wbig'gake' lao Jesúza' che'gake'ne':

—Maestro, cheeninto' gongacho' goklen gono' dga inabinto' li'.

³⁶Na' chi'e legake':

—¿Beran cheenile' gon' chele?

³⁷Na' che'gake'ne':

—We'gacho' latj kwe'nto' shlaa wej kwito'na' kat' solo inabi'lo gana' de balaan xen cho'na'.

³⁸Na' che' Jesúza' legake':

—Aga nezile' bin chñable. ¿Awzoile' wtil-le ka yel' zak'zi'ka' idi' illag' na' gak chele ka gak cha'?

³⁹Na' che'gake'ne':

—Wzointo'n.

Na' che' Jesúza' legake':

—Dii li, wtil-le ka yel' zak'zi'ka' idil illag' na' gak chele ka gak cha'. ⁴⁰Per daa nale kwe'le shlaa wej kwitaa bi nak lo na' gona'n, san ben'ka' ba mbej Chiozan', gakan chegake'.

⁴¹Ka beni ben'ka' zi shi, na' bllaagake' Jacóbona' na'ch Juanna'.
⁴²Na' wne Jesúza' legake', chi'e:

—Nezkzile ben'ka' chnabia' yell-lioni na' ben'ka' zakii chongake' byen chzenag ben' chegake'. ⁴³Per aga kan' chiyal' gonle. Shi nole cheenile gakle ben' mbejlawin chiyal' gon kwindle ka wen llin che ben'. ⁴⁴Na' shi nole cheenile gakle ben' zakii, chiyal' gakle ka ben' ndoo lla yel chone' xshin ben'. ⁴⁵La' nad', Ben' Bsel' Chioza' Yell-lioni, aga bid' kwenche gaklen ben' nad', san bid' kwenche gaklen' ben' na' wi'a yel' mban cha'na' kwenche yisla' ben' zan lao saaxana'.

Jesúza' biyone' ben' lchola' le Bartimeo

(Mt. 20:29-34; Lc. 18:35-43)

⁴⁶Na' bllingake' Jericóna', na' ka ba chichej Jesúza' yella' kon ben'ka' nakgake'ne' txen na' len ben' zanch zinogake'ne', na' chi' to ben' lchol cho'a neza' cheenile' no we' le' mech, na' lie' Bartimeo, xin to ben' le Timeo. ⁴⁷Na' ka benile' nan Jesús, ben' Nazaretan', wdena', na' wzoloe' chosyee, chi'e:

—¡Jesús, xin dia che dii Daví, biyesh'lall'gachi nad'!

⁴⁸Na' ben' zan bsheshlengake'ne' daa chosyee, na' zizikli chosyaache', chi'e:

—¡Xin dia che dii Daví, biyesh'lall'gachi nad'!

⁴⁹Na' wlez Jesúza' chi'e:

—Li inie'.

Na' wnegake'ne', che'gake':

—Btiplaloo, wzolla', ba chnie' li'.

⁵⁰Na' bzalee ka'lə lechaa nxoa kolleena' na' wzollee jsie' lao Jesúza'. ⁵¹Na' wnabile'ne', chi'e:

—¿Bin cheenilo' gon' cho'?

Na' che' ben' lchola'ne':

—Maestro, cheenid' ile'id'.

⁵²Na' che' Jesúza'ne':

—Wak yiyajo'. Daa ba benlilaloo nad', ba biyakilo'.

Na' katena' lii ble'teile' na' wnoe' Jesúza'.

Ka billin Jesúza' Jerusalénna'

(Mt. 21:1-11; Lc. 19:28-40; Jn. 12:12-19)

11 ¹Ka ba zoa yillingake' Jerusalénna', na' wdegake' gaozə gana' llia yell Betfagéna' na' yell Betániana', kwit Yaa Olívoza', na' Jesúza' bselee chop ben'ka' nakgake'ne' txen, ²chi'e legake':

—Li shaj yella' daa llia gaozə, na' ka illinle na', ile'ile to burr chbando', ba konon' kwia, da'b yaga'. Na' wsell-leb wche'leb nilə. ³Na' shi no inaz le': “¿Berache chsellzleb?”, na' ye'lene': “Xanchonan' chyaljile'b xtit, na' yiyontie'b.”

⁴Na'ch wyaj ben'ka' bselee, na' ble'gakile' to burr da'b to cho'a yoo gana' chde neza', na' bsellgake'b.

⁵Na' ben'ka' lle' na' wñabgakile' legake':

—¿Bin chonle? ¿Biçe chsellzleb?

⁶Na' gollgake' legake' daa goll Jesúza', na' be'gake' latj bche'gake'b. ⁷Na' bxoagake' xe'ka' koll' burra' na' jasangake'b lao Jesúza', na' wllie'b. ⁸Na' ben' zan bshiljgake' xe'ka' tneza', na' zi bałe' bhoggake' no zin na' wdixjgake'n tneza'.

⁹Na' ka ben'ka' llialo lao Jesúza' ka ben'ka' nogake'ne', chosyaagake', nagake':

—Li we'la'o Chioza'! ¡Gonleeyshga Xancho Chioza' beeni ba bselee! ¹⁰¡Gonleeyshga Xancho Chioza' yel' wñabia' che beeni zee lo dia che dii xozxto'cho Davina'! ¡Li da we'la'ocho Chioza' zoa yabana'!

¹¹Na' wyoo Jesúza' yell Jerusalénna' na' zeje' gana' zoa yoodo'na'. Na' ka biyoll bwie' doxenten na' ziyaje' Betániana' len ben'ka' shllin, daa ba wlle'.

Bllaa Jesúza' daa bibi dii zix llia yag yixwewa'

(Mt. 21:18-19)

¹²Na' betiyo ka biza'gake' Betániana', wdon Jesúza'. ¹³Na' zit'lə ble'ile to yag yixwew llia xlaguinna', na' jawie' shi lezkka' llian yixwewa'. Na' ka blline' zeelo xlaguiinna' llia, la' aga tiemp che yixwew kana'. ¹⁴Na'ch golle' yaga':

—¡Batch kwio' dii gao ben'!

Na' beni ben'ka' nakgake'ne' txen ka golle'n.



Ki nak yag yixwewa'.

Jesúza' bisheshe' beṅ'ka' chit' chde lesh' chyoodo'na'

(Mt. 21:12-17; Lc. 19:45-48; Jn. 2:13-22)

15Na' ka billingake' Jerusalénna', Jesúza' wyo'e lesh' chyoodo'na' na' wzoloe' bishesh biçheene' beṅ'ka' chit' chde na' beṅ'ka' cha'o chzi'. Na' bishi'e mes che beṅ'ka' chshaa mecha' na' bzoles bzolline' gana' chi' beṅ'ka' chit'gake' palomka'. 16Na' bi bi'e latj no sho'lench dii wit' wdie' lesh' chyoodo'na'. 17Na' wzoloe' chli' chsedile' beṅ'ka' lle' na', chi'e:

—Cho'a Xtill' Chioza' nan: “Lilla'na' nakan ga choe'lwill yog'te beṅ' lle' doxen lo yell-lioni nad'”, per le', ba nonzlen ka to ga chdop chllag wban.

18Na' ka beni bꞑozka' chṅabia' na' beṅ'ka' chli' chsedile' leya' ka wne', wzologake' wdiljlall'gake' nak gongake' witgake'ne', daa le chllebgake'ne', la' yog' beṅ' chibangakile' ka chli' chsedile'

legake'. 19Na' ka gol, biza'len Jesúza' ben'ka' nakgake'ne' txen Jerusalénna'.

Wbill yag yixwewa'

(Mt. 21:20-22)

20Na' betiyo shzila' ka wdegake' gana' zoa yag yixwewa', ble'gakile' ba wbill axt loinna'. 21Na' jadini Pédróna' daa goll Jesúza' yaga' na' chi'ene':

—Maestro, bwiakachi, yag yixwewa' daa bsheshleno'. Ba wbillan.

22Na' che' Jesúza' legake':

—Li gonlilall' Chioza'. 23Dii li nia' le, nottezə beena' yee yaani: “Bkwaskalə na' jsoa loo nisdona'”, na' bi gonchoplallee, san shajli'e, na' gak ka ine'. 24Daan nia' le', bittezə inable kat' we'lwill-le Chioza', li shajle' ba nakkzan gone'n, na' ikaalen. 25Na' kat'ka' choe'lwill-le Chioza', li si'xen che bish' ljjwell-lena' shi bi chone' chele kwenche Xalena' beena' zoa yabana' si'xene' saaxya cheleka'. 26La' shi le' bi si'xen che ljjwell-le, lekzka' Xalena', beena' zoa yabana', bi si'xene' saaxya cheleka'.

Yel' wñabia' che Jesúza'

(Mt. 21:23-27; Lc. 20:1-8)

27Na' billingake' Jerusalénna' sto shii, na' shlak chda Jesúza' lesh' chyoodona', wbig' bxozka' chñabia', len ben'ka' chli' chsedi leya' na' ben' golka' chñabia', 28na' che'gake'ne':

—Wnashki neto', ¿nora lsens cheyi chono' diiki? ¿No ben li' yel' wñabia'na' kwenche chono' diiki?

29Na' che' Jesúza' legake':

—Lekzka' nad', de to dii inabid' le'. Na' shi le' inale nad' daa inabid' le', na' inia' le' no lsens cheyin chon' yog' diiki. 30¿Noran bsel' Juanna' kwenche bidchoe' ben' nisa'? ¿AChiozan' bseleene', anti ben' yell-liona'zan? Li inashki nad'.

31Na'ch choe'len ljjwellgake' dill', che'gake':

—Shi ye'chone' Chioza' bseleene', lobe' ine' cho': “¿Berache ki wyajle'le che', lla?” 32Na' bite gak yize'chone' nozə bənaan bseleene'.

Bi biyaxjgakile' ye'gake'ne' ka' daa bllebgake' beñ' yellka',
la' yog'zgake' yoo yichjgake' Juanna' goke' to beñ' wdixjee daa
goll Chioza'ne'. ³³Na' gollgake' Jesúza':

—Bi ne_zinto'.

Na' che' Jesúza' legake':


—Lekzka' nad', bi inia' le' no beñ nad' ye! wñabia'na' chon'
diiki.

Jempl che wen llinka' beñ'ka' nak beñ' mal

(Mt. 21:33-46; Lc. 20:9-19)

12 ¹Na' wzolo Jesúza' bseesile' legake' to jempl, chi'e:
—To beñ' biyaze' yag uva. Na' wlo'en leeja', na'
benshawee gana' wsigake' uvaka', na' bene' to yoo sibə, gana'
kwia beena' gap wwie'n.

'Na'tech bene'n lo na' to chop beñ' na' wzee zeje' zit'. ²Na' ka
bllin lla yishibgake' uvaka', bselee to wen llin che'na' lao beñ'ka'
chap yag uvaka' kwenche lljaxi'e daa chidolee. ³Per beñ'ka'
bex'gake' wen llin che'na', na' bet wdingake'ne' na' bilaggake'ne'
to ka che'. ⁴Na' xan yag uvaka' bselee sto wen llin che' lawe'ka',



To beñ' biyaze' yag uva. Na' wlo'en leeja', na' benshawee gana' wsigake'
uvaka', na' bene' to yoo sibə, gana' kwia beena' gap wwie'n. Mr. 12:1

na' blaagake' yichje'na', na' chiya dii bengakile'ne'. ⁵Na'ch bselee stoe', na' betgake'ne'. Na'tech bselee zanch ben' yoblə; na' balgake' bengakile' zibia', na' zi balgake' betgake'.

⁶Na' ni chgaan bi'na' nakyen' xiine', bi'na' le chakile'. Na' bseleeb', la' gokile': "Wapgake' balaan bi' cha'ni." ⁷Na' ben'ka' nak lo na'gake' yag uvaka' che' ljwellgake': "Bi'nin gaki cheb' dga chapcho. Li da witchob', na' gakin checho." ⁸Na' bex'gake'b' na'ch betgake'b' na' bibejgake' kwerp chebaa gana' lle' yag uvaka'.

⁹Na' wñabi Jesúza' legake':

—¿Beraka chakile gon xan yag uvaka'? De de shaje' na' lljete' ben'ka' na' yiyone' yell-lío che'na' gana' lle' yag uvaka' lo na' ben' yoblə.

¹⁰¿Abigan' wlable Cho'a Xtill' Chioza'?, gana' na:

Yaja' daa bi wyoolall' wen yooka',
leyen'lannan' yaja' daa ba nchejcha yooná.

¹¹Dgan ben Xancho Chioza' na' nakan to dii yibanicho.

¹²Na'ch goklall'gake' gox'gake' Jesúza' daa gokbe'gakile' bchine' jempla' daa bi chajle'gake' che'. Per daa chllebgake' ben'ka' ndop nllag, biza'gake' bibi bengakile'ne'.

Janabgakile' Jesúza' shi chiya! chixjgake'

daa chñab ben' Rómaka'

(Mt. 22:15-22; Lc. 20:20-26)

¹³Na' bsele'gake' lao Jesúza' bal fariseoka' na' zi bal ben'ka' nak Heródeza' txen, kwenchezə kwejyelgakile'ne' na' lljadaogake' xya che'. ¹⁴Na' wyajgake' lawe'na', che'gake'ne':

—Maestro, nezinto' dillaa choo nakan dii li. Na' biga chshoo cho'a xtilloona' lao nottez ben', la' bi chwio' shi no nakgake'. San chli'o nez li che Chioza' kon ka nakan. Wnashki neto': ¿Achiya! chixjcho daa chñab beena' chñabia' Rómána', anti bi chiya! chixjchon?

¹⁵Na' gokbe'i Jesúza' aga do lall'gake'n che'gake'ne' ka', na'ch chi'e legake':

—¿Berache chyiljlall'zle wchixle nad'? Li gonshki ni to mech kwenche ile'ida'n.

¹⁶Na' be'gake'ne'n, na' che' Jesúza' legake':

—¿Nora cho'alawin na' no lein da' lee mechi?

Na' che'gake'ne':

—Che beena' chñabia' Rómanan'.

17 Na' che' Jesúza' legake':

—Na'len li we' beena' chñabia' Rómana' daa naki che', na' lekzka' li we' Chioza' daa naki che'.

Na' le bibangakile' daa golle' legake'.

Wñabgakile' Jesúza' nak gak kat' yiban ben' wetka'

(Mt. 22:23-33; Lc. 20:27-40)

18 Na' wyaj bał saduceoka' lao Jesúza'. Na' daa nagake' bich yiban ben' wetka', wñabgakile'ne' dga:

19—Maestro, ley daa bzej dii Moiséza' nan shi to ben' byo guete' na' yigaan xooole'na' wizeb na' kono xiingake' wzoa, ben' bisheena' chiyal' yikee nool wizeba' kwenche soa xiin dia che dii ben' bisheena'. 20 Na' to shii wzoa gall bish' ben'. Na' ben' necha' bshagnee, na' wite' na' kono xiine' wzoa. 21 Na' ben' wchopina' bikee noola', na' lekzka' wite' na' kono xiine' wzoa. Na' ka'kzə gok che ben' wyonina'. 22 Na' gall bish'te ben'ki wzoalengake' noola' na' kono xiingake' wzoa. Na' ka wde wit yog'lolgake', lekzka' wit noola'. 23 Na' kat' yiban ben' wetka', ¿norayen'en' gak ben' che noola', lla? la' gall bish'tegaken' wkaagake'ne'.

24 Na' che' Jesúza' legake':

—Nakllejzilen, daa bi nombia'le Cho'a Xtill' Chioza' ni yel' wak che'na'. 25 Kat'ka' yiban ben' wetka', koch no ikaa ljwellin, ni koch no wit' wde xiinin, san yiyakgake' ka anjlka' lle' yabana'. 26 Na' ka nak daa yiban ben' wetka', ¿abin' wlable daa bzej dii Moiséza' gana' cho'en dill' che yagdo'na' chal', na' goll Chioza' dii Moiséza': “Nadaan Chios che Abrahama', Isaaca', na'ch Jacoba'”? 27 Na' bi nake' Chios che ben' wet, san nake' Chios che ben' ban. Dii xen inleeb nakllejle.

Daa llialloch lao diika' bllia Chioza' bia' goncho

(Mt. 22:34-40)

28 Na' beni to ben' chli' chsedi leya' ka golle' legake'. Na' daa gokbe'ile' le wen billi'e xtilleeka', na' wñabile'ne':

—¿Beran lliarote nllia leya' bia' goncho?

29 Na' che' Jesúza'ne':

—Daa lliälote lao diika' nllia Chioza' bia' goncho, len daa na: “Li wzenag, le' ben' Israel, Xancho Chioza' zeelo nake' Chios. ³⁰Goki Xano' Chioza' do yichj do lalloo, axt ga zeelo chajniilo', na' do ka nak fuerz cho'na'.” ³¹Na' de wchopina' nakan ka dii necha': “Chiyal' gakilo' bish' l*j*wello'na' ka chaki kwino'.” Bich de dii zak'chi ka diiki.

³²Na' beena' chli' chsedi leya' chi'ene':

—Kakzan nakan, Maestro. Dii li kan' nakan: toz Chiozan' zoa, na' bichga zoa ka le'. ³³Na' daa gakicho Chioza' do yichj do lall'cho, na' axt ga zeelo chajniicho, na' do ka nak fuerz chechona', na' gaki bish' l*j*wellchona' ka chaki kwincho, zak'chan aga ka yog'lolte bayix'ka' chitgake' na' chzeygake'b lao Chioza'.

³⁴Na' ka gokbe'i Jesúza' kayen'nan billii beena' xtilleena', na' chi'ene':

—Zi lat'zə chyalljilo' kwenche inabia' Chioza' yichjlall'do'na'. Na' koch no biyaxji inabchile'ne'.

Crístona' nake' xiin dia che dii rey Davina'

(Mt. 22:41-46; Lc. 20:41-44)

³⁵Na' shlak chli' chsedi Jesúza' ben'ka' lesh' chyoodo'na', na' chi'e legake':

—¿Berache nazə ben'ka' chli' chsedi leya' nan Crístona', beena' ba mbej Chioza' inabi'e, nake' xiin dia che dii Davina'? ³⁶La' kwin dii Davina' bi'e dill' daa goll Espíritu che Chioza'ne', kana' wne':

Xancho Chioza' golle' Xan'na':

“Wche' kwit' de sh*l*ini,

shlak wzoa' xni'ona' ben'ka' chakzbani li'.”

³⁷Len kwin dii Davinan' golle' Crístona': Xan', ¿berache nazgake' Crístona' nake' xiin dia che dii Davina'?

Na' ben' zanka' ndop nllag bibagakile' xtilleena'.

Jesúza' chawe' xya che ben'ka' chli' chsedi leya'

(Mt. 23:1-36; Lc. 11:37-54; 20:45-47)

³⁸Na' ka chli' chsedi Jesúza' ben'ka', chi'e legake':

—Wsak'gale bi gonle ka ben'ka' chli' chsedi leya'. Le chibagakile' gon xe'ka' dii ton, na' cheengakile' yog'zə ben'

gagake' legake' balaan ladj lkwe' ben'. ³⁹Na' gana' chdop chllagcho choe'lwillcho Chioza' le chibagakile' kwe'gake' gana' chbe' ben'ka' zakii, na' ka'kzə chongake' ga de ye'l' wao. ⁴⁰Na' lekzka' chkaatezgake' lill nool wizebka', na' kwenche ina ben' le shlichā zej ben'ki lao Chioza', chongake' ka choe'lwill Chioza' ssha nlib. Na' daa chongake' ka', ba nakten ile'chgakile' ye'l' zi' walch.

Daa bzani to nool wizeb, bi'en Chioza'

(Lc. 21:1-4)

⁴¹To shii chi' Jesúza' gaozə gana' chgoogake' mech che yoodo'na' na' chwie' ben'ka' chgoogake' mecha'. Na' ben' zan ben' wni'aka' wloogake' mech xen. ⁴²Na' bllin to nool wizeb, ben' yesh', wlo'e chop sintabdo'. ⁴³Na' wne Jesúza' ben'ka' nakgake'ne' txen, chi'e legake':

—Dii li nia' le', nool wizebi ba be'che' dii xench aga ka yog'te ben'ka' wloo mech xench. ⁴⁴La' yog'gake' daa chichoonzannan' be'gake', san le', naktie' nool yesh', ba wlo'e doxen daa nape' la'kzi chyalljile'n.

Jesúza' bi'e dill' wllin lla kwiayi' yoodo'na'

(Mt. 24:1-2; Lc. 21:5-6)

13 ¹Ka chichej Jesúza' lesh' chyoodo'na', to ben'ka' nakgake'ne' txen chi'ene':

—Maestro, bwiakachi ka xochi nak yajki na' yooki.

²Na' che' Jesúza' le':

—Ka nak yooki chwiale naa, wllin lla kwiayi' yogaan na' ni sto yaj bich kwia koll' ljwellin.

Diika' gak kat' ba zoa te che yell-lioni

(Mt. 24:3-28; Lc. 21:7-24; 17:22-24)

³Na' ziyajgake' lo Yaa Olívoza' gana' nla' yoodo'na'. Na' shlak chi' Jesúza' na', Pédrona', Jacóbona', Juanna', na'ch Andréza' wñabgakile'ne' to lezgake':

⁴—Cheeninto' ino' neto' batran gak daa ba wno'. ¿Bera ka ile'into' gak kwenche inezinto' nan ba zoa gaoshosh gakan?

⁵Na' che' Jesúza' legake':

—Bi we'le latj no siye' le'. ⁶La' ben' zan ichej na' inazgake': “Nadaan Crístona”, na' ben' zan shajle'.

⁷Na' ka yenile chak wdil to ni to na', bi illeble. La' chonan byen gakkakan, per aga ba bllin lla te che yell-lionin. ⁸La' yidil-len ljwell yellka' na' ben' wñabia'ka' yidil-len ljwellgake'. Na' zan latj gak bedxo', na' gat' wbin, na' kwe' wdil wishesh. Kat' ba chak diiki shinz chzolo ka nak daa yen ile'i ben' yell-liokin.

⁹Wsak'gale, la' gongake' le' lall' na' ben'ka' chñabia' cho' ben' Israel, na' wit chingake' le' gana' chdop chllagcho choe'llwillcho Chioza'. Na' daa nakle nad' txen, lljwa'gake' le' lao ben' wñabia' xenka' na' lao nochlā ben'ka' chñabia', na' ka' gak we'le xtilaana' lawe'ka'. ¹⁰Na' ka zi' te che yell-lioni, chiyal' illilj dill' wen dill' kob cha'na' doxen yell-lioni. ¹¹Na' kat' ba zjwa'gake' le' lao ben'ka' chñabia', bi sele wneyi bin ye'le legake', san daa wzajni Chioza' len' inele, la' aga tobia'lall'zlen inele, san Espíritu Sántonan' ine. ¹²Beena' zoa ben' bish' golje', leteze' gone'ne' lo na' ben'ka' witgake'ne', na' beena' zoa xiine', leteze' gone' xiine'na lo na' ben'ka' witgake'ne', na' bal' ben', xiine'ka'tezə gongake' xaxneeka' lo na' ben'ka' witgake' legake'. ¹³Na' yog'zə ben' gakzbangakile' le' daa nonlilall'le nad'. Per beena' so saki bittez dii yen ile'ile' axt ka ziyoll diika' yen ile'ile', beenan' gat' to ye'l' mban che' zejli kaní.

¹⁴Na' kat' ile'ile' ba zoa daa nak dii zban inlebb latja' gana' bi chiyal' soan, na'ch ben'ka' lle' Judeana' chiyal' wxonjgake' shajgake' lo yaaka'lə. (Le' chlable dga, li shajniin.) ¹⁵Na' beena' llia koll' lille'na' ni bi gal' yiyetje' lljaleje' dii de loo lille'na'. ¹⁶Na' beena' chda lyixaa, ni bich gal' yiyaje' lille'na' kwenche lljadoyoe' xe'na'. ¹⁷¡Nyesh'laz gak che noolka' noa' na' noolka' chwall' chxop llana' gak ka'! ¹⁸Li inabi Chioza' bi gak dga kat'ka' chbe' dii zaga', ¹⁹la' ye'l' zak'zi' wal inleban nak daa yen ile'ile, daa konon' yen ile'kzi dezd ka bxe bsil Chioza' yell-lioni axt naa, na' kat' ba wde gokan kochno yen ile'i ka len. ²⁰Na' shi Xancho Chioza' bi wzeshee llaka' gak ka', kono yila shel'ka'. Per wzesheen daa chakile' ben'ka' ba wleje' nakgake' lall' nee.

²¹Na' kat' gak diika', shi no ina le': “Li wwia, ni ze Crístona”, wa ine', “Li wwia, na' zie”, bi shajle'le. ²²La' wchej ben' siye'gake' inazgake': “Nadaan Crístona”, na' ben' chonz ka chyixjee daa

che' Chioza'ne', na' wli'gake' no yeḷ' wak kwenche siye'gake' ben', axt shel' wxegakile' siye'gake' ben'ka' ba wlej Chioza' nakgake' lo nee. ²³Wsak'gale. Ba bzenid' le' ka nak yog' diiki zi' gak.

Kat' yiyed Crístona' dii yoblə

(Mt. 24:29-35, 42-44; Lc. 21:25-36)

²⁴'Na' kat' ba biyoll wde yeḷ' zak'zi'ka', lii yiḥolte lao wbillā' na' beo'do'na' bich wzeeni'n. ²⁵Na' beljdo'ka' ixopgakan na' yog' diika' lliā xan yabana' inibgakan. ²⁶Na' ile'gakile' nad', Ben' Bsel' Chioza' Yell-lioni, zizaa ladj bejka' kon yeḷ' wak choo yeḷ' wak xen cha'na' na' balaan cha'na'. ²⁷Na' wselaa anjl cha'ka' tap laate yell-lioni axt gana' zeelo chiyollan kwenche yitopgake' ben'ka' nak lall' na'.

²⁸'Li wwia ka chak che yag yixwewa': kat' chzolo chigaan na' chibia xlaguinna', na' chakbe'ile ba zoa yiyoo la'o linna'. ²⁹Ka'kzan, kat' ile'ile ba chak yog' diiki ba wnia' le' gak, na' gakbe'ile ba zoa gaoshosh te che yell-lioni. ³⁰Dii li nia' le', aga ba wit ben'ki zoa naa kat' gak yog' diiki. ³¹Yabana' na' yell-lioni te chegakin, san cho'a xtillaana' aga wde bi gak ka nan.

³²'Na' kono nezi bi lla bi gor gak diiki, ni anjlka' lle' yabana', ni nad' nak' Xiin' Chios. Toz Xa' Chioza' nezile'n.

³³'Li wsak', na' li se kwas, na' li we'lwil Chioza', la' bi nezile bat illin lla gakan. ³⁴Nakan ka ben to ben' ba zoa see shaje' to yell zit', na' golle' ben'ka' chon xshine'na' gapgake' lille'na'. Na' to togake' bene' lall' na'gake' daa gongake', na' golle' beena' chap cho'a leej che'na' bi guetlalleen. ³⁵Li se kwas, la' bi nezile bat yila' xan yoonā'; shi yilee chaldo'zə, wa yilee chel, wa kat' chbell tezka', wa yilee cheeni'lesdo'. ³⁶Shi tokonganə yilee na' yidolile' le' bich ze kwasle. ³⁷Dga nia' le', lekzka' yog'lol' bēnaan chep' ka', li se kwas.

Wloogake' xnezin gox'gake' Jesúza'

(Mt. 26:1-5; Lc. 22:1-2; Jn. 11:45-53)

14 ¹Chyallj zi chop llazə gal' Ini Paskwa', kana' chaogake' yetxtila' bi yoo levadúrana', na' bəoxka' chnābia' na' ben'ka' chli' chsedi leya' biyiljlall'gake' naklə siye'gake' Jesúza' kwenche gox'gake'ne' na' witgake'ne'. ²Na' che' ljwellgake':

—Bi gox'chone' lo lnina' kwenche bi wsees wcheencho ben' yell.

Bwazj to noolə set zixa' yichj Jesúza'

(Mt. 26:6-13; Jn. 12:1-8)

³Ka zoa Jesúza' Betániana', wyaje' lill beena' le Simón, beena' gok yillwe' daa le lepra. Na' shlak chi'e cho'a mesa', bllin to noolə noxee to lmet de yaj xochi yoollan set zix de nardo na' dii xen zakaan. Na' wdishje' yen lmeta' na' bwazje' set zixa' yichj Jesúza'. ⁴Na' bal ben'ka' lle' na' blaaagake', na' che' ljwellgake':

—¿Beraçe benditjz nooli set zixa'? ⁵She! bet'chokle'n na' bi'e mecha' ben' yesh'ka', la' zakaan che shon guiyoa lla che laxj ben'.

Na' bsheshlengake' noola' daa bene' ka'.

⁶Na' che' Jesúza':

—Bibi ye'lene'. ¿Beraçe chsheshlenzlene'? Daa ba bene' cha' nakan dii wen. ⁷Ka nak ben' yesh'ka', toshiizi soagake' ladjlena', na' wak gaklenle legake' kat'ka' cheenile'; san nad', aga toshiizin soalen' le'. ⁸Ka nak nooli ba bene' daa zeelo gok bene'. Ba bwazje' nad' set zixa' kwenche gakshao'zega kwerp cha'ni kat' wkwash'gake' nad'. ⁹Dii li nia' le', gattezə we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingakile'ne'.

Juda' chchebe' gone' Jesúza' lo na' ben' malka'

(Mt. 26:14-16; Lc. 22:3-6)

¹⁰Na' Jud Scariota', beena' nake' txen ben'ka' shllin, wyaje' lao bxozka' chñabia' kwenche gone' Jesúza' lo na'gake'. ¹¹Na' ka golle' ka', bibagakile' na' bchebgake' we'gake'ne' mech. Na' wzolo Juda' chinoe' nakan gone' kwenche gone' Jesúza' lo na'gake'.

Lle'na' zeelo wdaolengake' Jesúza'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹²Na' lla nech che lnina' kat' chaogake' yetxtila' daa bi nchixə levadúrana', llana' chitgake' xil'do'na' chaogake' lni Paskwa', ben'ka' nak Jesúza' txen wñabgakile'ne':

—¿Ga cheenilo' lljasini'anto' xshe' che lni Paskwi?

13Na' bselee chopgake', chi'e legake':

—Li shaj yell Jerusalénna' na' yillagle to ben' byo zino'e to chee nis, na' lljanólene'. 14Na' gana' yiyo'e, li yee xan yoona': “Maestrona' ne': ¿Garan zoa yoona' gana' gaolene' ben'ka' nakgake'ne' txen lle' lni Paskwi?” 15Na' wliile' le' to yoo xen dii llia shkwia cha'lə ga ba nonshao'tie'. Na' nan' wsini'ale daa gaacho xshe'na'.

16Na' wza' ben'ka' bselee, wyajgake' yella'. Na' gok kon kayen' golle' legake'. Na' bsini'agake' daa gaogake' lle' lni Paskwa'.

17Na' ka goj billinlen Jesúsza' ben'ka' shllin yoona'. 18Na' shlak chi'gake' cho'a mesa' chaogake', goll Jesúsza' legake':

—Dii li nia' le', tole chi'le ni chaolenle nad' gonle nad' lo na' ben'ka' chakzi' chakzbani nad'.

19Na' gokyesh'gakile', na' wzolo to togake' chnabgakile'ne':

—¿Anadaan gon' ka', lla?

20Na' che' Jesúsza' legake':

—Ladjleni, ka le' nakle shllin chleejenle nad' yetxtila' loo yeeni, len beena' gon ka'. 21Ka nak nad', Ben' Bsel' Chioza' Yellioni, wit ben' nad' ka na Cho'a Xtill' Chioza'. Per nyesh'laz gak che beena' gone' nad' lo na' ben'ka'. Naklan wen shel'ka' bi golje'.

22Na' shlak chaogake', bex' Jesúsza' yetxtila' na' bi'e Chioza' yel' choxken, na' bcoxje'n na' bi'en legake', chi'e:

—Li gao dga. Lennan' kwerp cha'ni.

23Na' bexee kopa', na' bi'e Chioza' yel' choxken na' bdie'n lawe'ka' na' yog'lolgake' weejgake' daa yollan. 24Na' chi'e legake':

—Lennan' xchen'na' daa gon ka gak li dii koba' bcheb Chioza' gone'. Na' laljan kwenche gaklenan ben' zan. 25Dii li nia' le', bichga yeej' xis uvana' axt ki illin lla yeeja'n gana' chnabia' Chioza'.

Jesúza' golle' bi wcheb Pédróna' shi nombi'ene'

(Mt. 26:30-35; Lc. 22:31-34; Jn. 13:36-38)

26Na' ka biyoll belgake' be'la'ogake' Chioza', na'ch wyajgake' lo Yaa Olívoza'. 27Na' che' Jesúsza' legake':

—Yog'le le' kwey yichjle nad'. La' Cho'a Xtill' Chioza' nan: “Wit' beena' chap xil'ka', na' guesles xil'ka' chape'.” 28Per kat' ba biban' ladj ben' wetka', na' yiyaa Galileana' lljalez' le'.

29Na' che' Pédróna'ne':

—La'kzi yog' ben'ki choonlall'gake' li', nad' bi gon' ka'.

30Na' che' Jesúsza'ne':

—Dii li nia' li', naanyel ka zi' kwell teza' de wchop shii, shon shii wi'o dill' nan bi nombi'o nad'.

31Na' zeyid Pédróna' chi'ene':

—La' guetlencia' li', biga inia' bi nombi'a li'.

Na' yog'zgake' che'gake'ne' ka'.

Be'lwill Jesúsza' Chioza' gana' le Getsemaní

(Mt. 26:36-46; Lc. 22:39-46)

32Na' wyajgake' to latj gana' le Getsemaní, na' che' Jesúsza' ben'ka' nakgake'ne' txen:

—Nizə li kwe' shlak llje'lwill' Chioza'.

33Na' bchi'e Pédróna', Jacóbona', na'ch Juanna', na' wzoloe' chakyeshile' na'ch chakchgaile' dii wal inleeb. 34Na' chi'e legake':

—Axt chaklikazid' lii guettia' daa le chakyeshii yichjlall'dawaani. Li igaan nizə na' bi guesle.

35Na' wzee zi lat' kwite'ka', na' bchek' xibe'na' lo yona' na' be'lwille' Chioza' chi'ene' shi wak ten ka'zə daa wtile'.

36Na' chi'e:

—Xadawaa, aga bi dii lallj cho' li' de. Bislagach nad' lawi dga ba zoa idil illag'. Per aga gak ka cheenid', san gak ka cheenilo' li'.

37Na' biyaje' gana' lle'gake' na' ble'ile' ba chesgake'. Na' chi'e Pédróna':

—Simón, ¿Aba cheson'? ¿Abikzə bchejlat'gailo' la'ch' tgor bi gueso'? 38Bi guesle, li we'lwill Chioza' kwenche bi we'zle latj gon beli chenna' le' gan. Aga ki cheeni yichjlall'do'chona' gonchon per beli chenna' bi chizoin.

39Na' wyaje' sto shii jelwille' Chioza', na' toz ka golle'ne'. 40Na' ka billine' gana' lle'gake', na' bizle'ile' chizesgake', la' jalawe'ka' bi chizoyin bishgala'. Na' bibi billelgakile' ye'gake'ne'. 41Na' ka billine' de wyon shii, chi'e legake':

—¿Ani cheskzle? Ba gok. Ba bllin gor nad', Ben' Bse'l' Chioza' Yell-lioni, gak' lo na' ben' saaxyaka'. 42Li chas. Li sho'. Ba za' beena' gone' nad' lo na'gake'.

Bex'gake' Jesúza'*(Mt. 26:47-56; Lc. 22:47-53; Jn. 18:2-11)*

43Ni choe'te Jesúza' dill' ka bllin Juda', beena' wlen ben'ka' shllin, lene' ben' zan ben'ka' bsel' b̄xozka' ch̄nabia' len ben'ka' chli' chsedi leya' na'ch ben' golka' ch̄nabia', nox'gake' spad, na' no yag. 44Na' Juda', beena' bene'ne' lo na' ben'ka', ba be'le' dill', chi'e:

—Beena' wnop', len' gox'le, na' wche'lene'.

45Na' ka bllingake', jabigee lao Jesúza' na' chi'ene':

—¡Maestro!

Na'ch bnopene'. 46Na' lii bex'tegake' Jesúza' b̄che'gake'ne'.

47Na' to beena' len na' wleje' spad che'na' b̄chogue' sh̄laa nag xmos b̄xoz choo b̄xoz xenna'. 48Na' che' Jesúza' legake':

—¿Berache za'zle nox'le no spad no yag kwenche gox'le nad' ka to no ben' wban? 49Yog' lla wzoa' ladjlena' bli' b̄sedid' loo yoodo'na', na' biga bex'le nad'. Per chonan byen gak ka na Cho'a Xtill' Chioza'.

50Na' yog'lol' ben'ka' ben Jesúza' txen wchoonlall'gake'ne' na' b̄xonjgake'.

Bi' xkwidaa bixonj

51Na' to bi' xkwid' nob' le' ndobb' to lech'. Na' ka bex'gake'b' 52bsam' lechaa ndobb' na' b̄xonjb' gal'yidzb'.

Bdegake' Jesúza' lao ben'ka' ch̄nabia' ben' Israelka'*(Mt. 26:57-68; Lc. 22:54-55, 63-71;**Jn. 18:12-14, 19-24)*

53Na' jwa'gake' Jesúza' lao b̄xoz choo b̄xoz xenna', na' bdi'a yog'lol' b̄xozka' ch̄nabia' na' ben' golka' ch̄nabia' na'ch ben'ka' chli' chsedi leya'. 54Na' zit' zit'lə jano Pédrone'ne' bllintie' lesh' lill b̄xoz choo b̄xoz xenna'. Na' wche'lene' ben'ka' chap yoodo'na' chbillgake' cho'a yi'na'.

55Na' b̄xozka' ch̄nabia' na' yog'lol' ben'ka' ch̄nabia' ben' Israelka' lle' na' chiyiljyollgake' ga si' sengake' kwenche w̄choglogake' che Jesúza' guete', per bi bllel dii gao xya che'. 56La'kzi ben' zan chiya de wxiye' che'gake' che', bi bidili cho'a

dillaa choe'gake'. 57 Bałgake' wzolla'gake' chziye'gake' na' chaogake' xya che', che'gake':

58—Neto' ba beninto' ne': “Nad' wchĩnj yoodo'ni dga ben ben' yell-lioki. Na' ka gak shon lla yilis' ston na' aga ben' yell-lionichan gone'n.”

59 Na' la'kzi wxiye'gake', bi bidili cho'a xtilleeka'.

60 Na' b̄xoz choo b̄xoz xenna' wzollee ladj ben'ka' na' chi'e Jesúza':

—¿Abikz bi ino' cheyi dga na ben'ki cho'?

61 Na' Jesúza' wzie' lliz bibi gollkeze'. Na' b̄xoz choo b̄xoz xenna' chizi'ene':

—¿Alin' Crístona', Xiin Chioza'?

62 Na' che' Jesúza'ne':

—Awe, nadaan. Na' ile'ile nad', Ben' Bsel' Chioza' Yell-lioni, chi'a de shli che Chioza', ben' yel' wak choo ben' yel' wak xenna', na' lekzka' ile'ile' zizaa ladj bejka' ze xan yabana'.

63 Na' b̄xoz choo b̄xoz xenna' bsho' bchez' xe'na' kwenche chli'n nan le chlee. Na' chi'e:

—Bich chyalljicho ben' gawe' xya che beeni. 64 Kwinle ba benile ka chnie' che Chioza'. ¿Nakra gonchon?

Na' yog'lolgake' bhoglogake' che' nan chiya' guete'.

65 Na' bałgake' wzologake' chlla'gake'ne' xeneeka'. Na' bsejgake' jalawe'na' na'ch chgap' chball'gake'ne', na' che'gake'ne':

—Wnashki, non bet li'.

Na' ben'ka' chap yoodo'na' wdap'gake' xague'na'.

Bi b̄cheb Pédrona' shi nombi'e Jesúza'

(Mt. 26:69-75; Lc. 22:56-62;

Jn. 18:15-18, 25-27)

66 Na' Pédrona' zie' lesh' chyoonā de lli'lə ka bllin to noolə, ben' nak xmos b̄xoz choo b̄xoz xenna'. 67 Na' ka ble'ile' Pédrona' chbille' cho'a yi'na', na' wzie' chwie'ne' chi'e:

—Lenon' nako' txen Jesús, ben' Nazareta'.

68 Na' bi b̄cheb Pédrona', san chi'e:

—Bi nombi'a beena', ni bi nezid' bi dillaan choo.

Na' bicheje' na' jazie' cho'a leeja'. Na' wchell to tez. 69 Na' ble'i noola'ne' sto shii, na' golle' ben'ka' sto:

—Beenin lene' ben'ka' nak Jesúza' txen.

70Na' sto shii bi b̄chebe' nake'ne' txen. Na' ka gok zi shloll, ben'ka' lle' na' gollgake'ne' sto shii:

—Dii li lenon' nako'ne' txen, la' nakbia' nako' ben' Galilea.

71Na' Pédrona' wzoloe' chone' z̄nia, chi'e:

—Chioza' gone' yel' zi' cha' shi chziye'zan nia' bi nombi'ane'.

72Na' katena' lii wchellte teza' de wchop shii. Na' jadini Pédrona' daa goll Jesúza'ne': “Ka zi' kwell teza' de wchop shii, na' gak shon shii bi w̄chebo' shi nombi'o nad'.” Na' wzoloe' chbelle'.

Bdegake' Jesúza' lao Pilátona'

(Mt. 27:1-2, 11-14; Lc. 23:1-5; Jn. 18:28-38)

15 1Na' ka wyeeni' bidi'a b̄xozka' ch̄n̄abia' len ben' golka' ch̄n̄abia', na' ben'ka' chli' chsedi leya' na'ch yog'lōl ben'ka' ch̄n̄abia'gake' yell Israela'. Na' b̄chejgake' Jesúza' jwa'gake'ne' lao Pilátona'. 2Na' w̄n̄abi Pilátona'ne', chi'e:

—¿Alin' nako' ben' w̄n̄abia' che ben' Israelka'?

Na' che' Jesúza'ne':

—Kan' ba wno'.

3Na' b̄xozka' ch̄n̄abia' dii zan dii chaogake' xya che'. 4Na' che' Pilátona'ne' sto shii:

—¿Abibi inakzo'? Bwialat', dii zan dii chaogake' xya cho'.

5Na' bibi goll Jesúza'ne'. Na' bibani Pilátona' daa bibi golle'ne'.

B̄choglogake' guet Jesúza'

(Mt. 27:15-31; Lc. 23:13-25; Jn. 18:38–19:16)

6Na' kat' chal' ln̄ina, Pilátona' chisane' to ben'ka' nseje' lillyana', beena' in̄ab ben' yellka' wsane'. 7To ben' le Barrabás die' lillyana' len ben'ka' benlene' xyana' daa b̄xegake' wdila'. 8Na' bdi'a bllag ben' yellka', na' che'gake' Pilátona' gone' ka chonkze' yog' yiz. 9Na' che' Pilátona' legake':

— ¿Acheenile yisan' ben' w̄n̄abia' cheleni, le' nakle ben' Israel?

10La' chakbe'ile' nan b̄xozka' ch̄n̄abia' daa chakxe'zgakile'nen' jwa'gake'ne' lawe'na'. 11Na' b̄xozka' ch̄n̄abia' bta b̄negake' ben'ka' lle' na' kwenche in̄abgake' yisane' Barrabáza'. 12Na' che' Pilátona' legake':

—Na' bera cheenile' gonid' beena' nale nake' ben' wñabia' chele, le' ben' Israel.

13 Na' besyaagake' che'gake':

—¡Bdee lee yag cruza'!

14 Na' che' Pilátona' legake':

—¿Bera dii malan' bene'?

Na' zizikli besyaagake' che'gake':

—¡Bdee lee yag cruza'!

15 Na' daa goklall' Pilátona' yigaane' wen lao ben'ka' lle' na', bisane' Barrabáza'. Na' bene' mandad wit chingake' Jesúsza', na'tech bene'ne' lo na' ben'ka' wda'gake'ne' lee yag cruza'.


16 Na' bche' soldadka' Jesúsza' lesh' chyoona' gana' chon Pilátona' ye'l joshisa', na' biti'a bishaggake' yog' soldadka' lle' na'. 17 Na' bwakwgake'ne' to lech' xna, na' bengake' to bxoon de xis yesh' na' bllingake'n yichje'na' ka to corona. 18 Na' wzologake' chosyaagake' nagake':

—¡Soashga ben' wñabia' che ben' Israelka' mbalaz!

19 Na' wdingake' xisa' yichje'na', na' bllaa xeneeka' le', na' bchek' xibe'ka' lawe'na' bengake' ka ben' chgwee balaan. 20 Ka biyoll btitjgakile'ne', bikwasgake' lech' xnana' daa bxoagake'



Na' soldadka' bengake' to wyitj kwenche yilaagake' xe'na' na' ikaagake' daa yidol' to togake'. Mr. 15:24



*Na' bda'lengake'ne' chop beñ' wban, toe' wda' kwite'
de shlina', na' stoe' kwite' de robesa'. Mr. 15:27*

kolleena' na' biwakwgake'ne' xe'na'kzə. Na' wlejgake'ne' kwenche
ljada'gake'ne' lee yag cruza'.

Bda'gake' Jesúza' lee yag cruza'
(Mt. 27:32-44; Lc. 23:26-43; Jn. 19:17-27)

²¹To beñ' yell Cirene lie' Simón, xa Alejándrona' na' Rúfona',
zizee lyixaa. Na' ka billague' legake', bengake' byen bi'e yag
cruz che Jesúza'.

²²Na' bche'gake' Jesúza' latja' le Gólgota, na' zejin: Latj che llit
yichj beñ' wet. ²³Na' bshabgakile'ne' vino daa nchixə mírrana',
per bi weeje'n. ²⁴Na' bda'gake'ne' lee yag cruza'. Na' soldadka'
bengake' to wyitj kwenche yilaagake' xe'na' na' ikaagake' daa
yidoj' to togake'.

²⁵Na' chida ga kana' bda'gake'ne' lee yag cruza'. ²⁶Na' yichj
yag cruz che'na' bda'gake' to dii cho'en dill' biche nda'gake'ne' lee
yag cruza', nan: "Beenin beñ' wñabia' che beñ' Israelka'." ²⁷Na'

bda'lengake'ne' chop ben' wban, toe' wda' kwite' de shlina', na' stoe' kwite' de robesa'. ²⁸Na' billinin ka na Cho'a Xtill' Chioza' daa nan: “Ble'gakilene' ka to ben' mal.”

²⁹Na' ben'ka' chde na', chnelegakile'ne', na' chta yichje'ka' che'gake':

—jLin' wnazo' yichinjo' yoodo'na' na' lo shon llazə yiyono'n, ³⁰bislashki kwino' na' biyetj lee yag cruza'!

³¹Na' lekzka' chon bxoza' chnabia' len ben'ka' chli' chsedi leya', chnelegakile'ne', che'gake':

—Ben' yoblə gok bisle', na' bi chak yisla kwine'. ³²Shi leile' len' Crístona', ben' wnabia' chechona', cho' ben' Israel, yiyetjshkile' lee yag cruza' naa kwenche ile'teicho na' shajle'cho che'.

Na' axt len ben'ka' da'lene' lee yag cruza' chnelegakile'ne'.

Ka wit Jesúza'

(Mt. 27:45-56; Lc. 23:44-49; Jn. 19:28-30)

³³Ka bllin gobill, doxen yell-liona' bichol, bllinte chida shon.

³⁴Na' chida shon besyaa Jesúza' zillj, chi'e:

—Eloí, Eloí, ¿lama sabactani?^b —na' zejín: Chios cha', Chios cha', ¿biche ba wlej yichjzo' nad'?

³⁵Na' bal ben'ka' lle' na' bengakile' daa wne' na' che'gake':

—Li wzenag, ba chaxe' Elíaza'.

³⁶Na' zejdo toe' na' bleeje' to dii chzi' nisa' gana' yollə vino daa zichj zla' na' bzoe'n to lo xis kwenche bzoe'n cho'ena' xope'n, na' chi'e:

—Jwayishkile'na', wwiashkicho shi wid Elíaza' yiletje'ne'.

³⁷Na' besyaadia Jesúza', na'ch wite'. ³⁸Na' ka wite', lechaa ze loo yoodo'na' bcheza'n gokan choplə. ³⁹Na' beena' chnabia' soldadka' zie' lao Jesúza', ka benile' besyee na' ble'ile' ka gok wite', na' chi'e:

—Dii li beenin Xiin Chioza'.

⁴⁰Lekzka' zi bal noolka' lle'gake' de zit'lə chwiagake'. Na' ladje'ka' len María ben' Magdálana', na' Saloména', na'ch María, beena' nak xna' Joséna' len Jacóbona', ben' neshaa. ⁴¹Noolkin wnogake' Jesúza' na' goklengake'ne' kana' zoe' gana' mbani

^b 15:34 Eloí, Eloí, ¿lama sabactani?: dill'ki nakgakan dill' arameo.

Galileana'. Na' lekzka' len zanch noolka' ben'ka' wyajlengake'ne' Jerusaléna'.

Bkwash'gake' Jesúza'

(Mt. 27:57-61; Lc. 23:50-56; Jn. 19:38-42)

42Na' llana' gok ka' nakan llana' chsini'a ben' Israelka' che llana' chombaangake'. Na' ka gol, 43bllin José ben' Arimatéana', beena' nak txen ben'ka' chnabia' ben' Israelka', na' lene' none' lez beena' wsel' Chioza' inabi'e. Na' biyaxjile' wyaje' lao Pilátona' janabe' lsens yiletje' kwerp che Jesúza'. 44Na' bibani Pilátona' daa ba wite'. Na' goxe' beena' chnabia' soldadka' kwenche inabilene' shi dii likzan ba witen'. 45Na' ka che' beena' chnabia' soldadka' ba wite' na' wxenlallee, na' bi'e lsens biletj Joséna' kwerp che'na'. 46Na' wxi' Joséna' to lech' de lino na' biletje' kwerp che Jesúza' na' bitobe'ne' lechaa. Na' jlo'ene' to loo blej, na' bisejile'n to yaj xen. 47Na' María ben' yell Magdálana', na' María, xna' Joséna', chwiayen'gake' gana' jlo'ene'.

Biban Jesúza' ladj ben' wetka'

(Mt. 28:1-10; Lc. 24:1-12; Jn. 20:1-10)

16 1Na' ka wde lla sabda', llana' chombaang ben' Israelka', María ben' Magdálana' len Saloména', na'ch María, xna' Jacóbona', wxi'gake' diika' chla' zix kwenche wlla'gake'n kwerp che Jesúza'. 2Na' lla nech che xmanna', shinza chla' wbilldo'na', wyajgake' cho'a ba che'na'. 3Na' ka zejgake' che' ljwellgake':

—¿Nora gaklen cho' kwase' yaja' daa chi' cho'a ba che'na', lla?

4Per ka bllingake', ble'gakile' bich chi' yaj xenna' cho'a bana'. 5Na' ka wyoogake' loo bana', ble'gakile' chi' to ben' xkwid' de shli che bana' nakwe' to lech' llyish dii ton. Na' le blleb noolka'. 6Na' chi'e legake':

—Bi illeble. Le' chiyilje Jesús, ben' Nazareta', beena' bda'gake' lee yag cruza'. Ba biban beena', bich zoe' ni. Li wwiakachi gana' wdixjgake'ne'. 7Li yiyaj lao ben'ka' nakgake'ne' txen na' len lao Pédrona', na' li ljayellgake': “Ba ziyaje' zjaleze' le' Galileana', na' na' yile'ile'ne' sto shii, kon ka wne' le'.”

8Na'ch bichej noolka' loo bana' ziyajdogake' axt chxiztitgake' daa le chllbgake'. Na' kono bi gollgake' daa le bllebgake'.

Bli'lao Jesúza' María ben' yell Magdálana'

(Jn. 20:11-18)

⁹Na' ka biban Jesúza' ladj ben' wetka' lla nech che xmanna' shzildo', zigaate bli'lawe' María ben' yell Magdálana', beena' bibej Jesúza' gall dii xiw'ka'. ¹⁰Na' Mariana' wyaje' lao ben'ka' wdalen Jesúza' txen. Na' ka blline' lawe'ka' le chakyesh'gakile' na' chbellgake', na' golle' legake' ba biban Jesúza'. ¹¹Na' ka beni ben'ki mban Jesúza' na' ba ble'teyi Mariana'ne', bi wyajle'gake'.

Bli'lao Jesúza' chop ben'ka' nakgake'ne' txen

(Lc. 24:13-35)

¹²Ka biyoll gok ka', chop ben'ka' nak Jesúza' txen ngoogake' nez zejgake' lyixaa, na' bli'lawe' legake' na' nake' nlla'lá. ¹³Na' biyajgake' gana' lle' ben'ka' sto, jayellgake' legake' ba ble'gakile'ne', na' ni chegake' bi wyajle'gake'.

**Jesúza' golle' ben'ka' nakgake'ne' txen we'gake' xtilleena'
doxen lo yell-lioni**

(Mt. 28:16-20; Lc. 24:36-49; Jn. 20:19-23)

¹⁴Na' wdetch, bli'lao Jesúza' ben'ka' shnej shlak chi'gake' chaogake'. Na' bsheshlene' legake' daa bi chajle'gake' na' daa nakgake' lall'do' chech, la' bi wyajle'gake' che ben'ka' ble'gakile'ne' ka wde bibane'. ¹⁵Na' chi'e legake':

—Li shaj doxen yell-lioni, li lljtixje'i yog'lol ben' dill' wen dill' kob cha'na'. ¹⁶Beena' shajle' na' choe' nisa', gat' ye'l mban che' zejli kani, san beena' bi shajle', chogbi'a kwiayee. ¹⁷Na' diikin gon ben'ka' nonlilall' nad': wchingake' lia'na' yibejgake' dii xiwaa yoo ben'; na' inegake' dill' kob dii bi nombia'gake'; ¹⁸na' shi gonzin gox'gake' no bel wa yeejgake' dii nak yierb, aga bi gaggakile'. Na' lekzka' wxoa neeka' yichj ben' we'ka' na' yiyakgakile'.

Biyep Jesúza' yabana'

(Lc. 24:50-53)

¹⁹Ka biyoll bshaljlene' legake', Xancho Jesúza' biyep'e yabana' na' jachi'e kwit Chioza' shlaa de shlina'. ²⁰Na' ben'ka' nakgake'ne'

txen wyajgake' doxen jtixje'gake' cho'a xtilleena' na' Xancho
Jesúza' goklene' legake' bengake' yel' wakka' kwenche wyajle'
ben' dillaa be'gake' nakan dii li.